

74
6640
92





五禮通考卷第二百四十

內廷供奉禮部右侍郎詹秦萬編輯

翰林院侍讀學士嘉定王鳴盛

李太保總督魏都史桐城方觀承同訂

直隸按察司副使元和宋宗元


參校

軍禮八

校閱

蕙田案古者寓兵於農有校閱之禮有田獵之禮考周禮大田之禮簡眾也又云聽師田以簡稽春而振旅夏而芟舍秋而治兵冬而大閱非徒以饁禽取獸供賓客宗廟之用而已蓋安不忘危講武之儀即寓於游田之內故校閱即田獵田獵即校閱二者不可分也然觀月令講武飭事之文則其事亦有不為田獵者即康成注亦未嘗與冬狩混而為一

五禮通考卷第二百四十 校閱



也至春秋一經所書大閱治兵之事尤多蓋列國多故臨戰而習武以是為權禮焉漢唐以下其事益分古今異宜無容泥古也今分為二門而於大司馬四時之狩悉歸之田獵云

春秋莊公八年公羊傳祠兵者何出曰祠兵入曰振旅其禮一也皆習戰也

國語周語三時務農而一時講武故征則有威守則有財

蕙田案以上總論

禮記月令孟冬之月天子乃命將帥講武習射御角力

注為簡習之亦因營室主武士也

仲冬之月飭死事

注飭軍士戰必有死志疏因殺氣之盛以飭軍士使戰者必有死志故曰飭死事也

蕙田案以上王畿校閱之禮

春秋桓公六年秋八月壬午大閱

注述齊為大國以成事徵諸侯之成嘉美鄭忽而忽欲以有功

為班首怒而訴齊人魯人懼之故以非時簡車馬疏公狩于郎公狩于禚皆書公大蒐大閱不書公者周禮雖四時教戰而遂以田獵但蒐閱車馬未必皆因田獵田獵從禽未必皆閱車馬何則怠慢之圭外作禽荒豈待教戰方始獵也公及齊人狩于禚乃與鄰國共獵必非自教民戰以矢魚于棠非教戰之事主為游戲而非為游戲如此之類例不書公定十四年大蒐于比蒲邾子來會公公身在蒐而經不書公知其法所不書以其國家大事非公私欲故也且比蒲邾間皆舉蒐地此不言地者蓋在國簡閱未必田獵昭十八年鄭人簡兵大蒐在于城內此亦當在城內

左氏傳秋大閱簡車馬也

公羊傳大閱者何簡

車徒也何以書蓋以罕書也

注大簡閱兵車使司任用而習之也此年簡徒謂之蒐三年簡車謂之大閱五年簡徒謂之大蒐

穀梁傳大閱者何閱兵車也修教明諭國以

道也平而修戎事非正也

注因四時田獵以習用戎事平謂不因田獵無事而修之

蕙田案杜預以大閱為因事習武何休以大閱為五年定制二說不同然皆以為與田獵異事書之於策非有所譏也觀孔氏正義自

明乃穀梁以為非正范甯以不因田獵貶之恐非經意

莊公八年春王正月師次于郎以俟陳人蔡人甲午治

兵注治兵于廟習號令將以圍敵 禮周禮仲春教振旅仲秋教治兵穀梁云

出曰治兵習戰也入曰振旅習戰也釋天云出為治兵向威武也入為振旅定

尊卑也孫炎云出則功賤在前貴勇力也入則尊老在前復常法也彼言治兵振

旅皆謂因田獵而選車徒教戰法習號令知此治兵亦是習號令此治兵于廟欲

就尊嚴之處使之畏威用命耳但軍旅之眾非廟內所容止應告于宗廟出在門

巷習之昭十八年傳稱鄭人簡兵大蒐將為蒐除注云治兵于廟城內地迫故除

廣之是告于廟習于巷也下有圍鄰知治兵為圍鄰也沈云周禮中秋治兵月令

孟春云是月也不可以稱兵稱兵必天殃所以甲午治兵者以為圍鄰故非時治

兵猶如備難而城雖非時不譏沈又云治兵之禮必須告廟告廟雖是內事治兵

乃外事故雖告廟仍用甲午且治兵則征伐之類又為圍鄰雖在郊內亦用剛

日甲午治兵公羊以穀梁傳出曰治兵習戰也入曰振旅習

戰也治兵而陳蔡不至矣 注師次于郎以侯陳人蔡人 兵事以嚴終故曰

善陳者不戰此之謂也善為國者不師 注道德齊禮鄰國望之

善師者不陣 注師眾素嚴不 歡如親戚何師之為

善陣者不戰 注軍陣嚴整敬望 而畏之莫敢與戰

善戰者不死 注投兵勝地 無奔背散亡

善死者不亡 注民盡其命

蕙田案以上魯校閱之禮

國語齊語管仲作內政而寄軍令制三軍有中軍之鼓

有國子之鼓有高子之鼓春以振旅秋以治兵是故卒

伍整于里軍旅整于郊

蕙田案以上齊校閱之禮

春秋昭公十四年左氏傳夏楚子使然丹簡上國之兵

于宗邱且撫其民分貧振窮長孤幼養老疾收介特救

災患宥孤寡赦罪戾詰奸慝舉淹滯禮新敘舊祿勲合

親任良物官 注上國在國都之西西方居上流故謂之上國宗邱楚地特舉

兵者戈安戰酉不夷矛鄭元云步卒之五兵則無夷矛而有弓矢然則兵者戰器

之名戰必令人執兵因即名入為兵也此簡上國之兵謂簡料人丁之強弱于宗

邱之地集而簡之 使屈罷簡東國之兵于召陵亦如之 注兵在國

于邊疆息民五年而後用師禮也

蕙田案以上楚校閱之禮

德公二十七年左氏傳楚子將圍宋使子文治兵于睢

注子文時不為令尹故云使治兵習號令也睢楚邑也終朝而畢不戮一人注終朝自旦及食時也子文欲委重于子玉故

略其事子玉復治兵于蔿注子玉為令尹故蔿楚邑終日而畢鞭七人貫三人

耳國老皆賀子文子文飲之酒注賀子玉堪其事蔿賈尙幼後至

不賀子文問之對曰不知所賀子之傳政于子玉曰以

靖國也靖諸內而敗諸外所獲幾何子玉之敗子之舉

也舉以敗國將何賀焉子玉剛而無禮不可以治民過

三百乘其不能以入矣苟入而賀何後之有注三百乘二萬二千五百人信

子玉力小任重將不能以入其眾而治之也苟子玉能入其眾而舉賀典未為後時而失禮言不勝其任不足賀

蕙田案以上校閱失禮之事

右校閱

通典漢興設南北軍之備外命天下郡國選能引強蹶

張材力武猛者以為輕軍騎士材官樓舡常以立秋後

郊禮畢斬牲於東門以薦陵廟肆孫吳兵法六十四陣

每十月都試金革騎士各有員數

蕙田案劉昭注續漢志引魏書漢承秦制十

月會五營士為八乘進退名曰乘之晉志亦

曰都講

續漢禮儀志漢儀立秋之日自郊禮畢始揚威武斬牲

於郊東門以薦陵廟乘輿御戎輅白馬朱鬣躬執弩射

牲牲以鹿麋太宰命謁者各一人載以獲車馳送陵廟

還宮遣使者齎束帛以賜武官武官肄兵習戰陣之儀

斬牲之禮名曰驅劉兵官皆肆孫吳兵法六十四陣名

曰乘之

晉書禮志既還公卿以下陳雒陽街乘輿到公卿以下

拜天子下車公卿親識顏色然後還宮

禮儀志卷三十一 校閱

漢書文帝本紀十四年冬匈奴寇邊殺北地都尉印遣
三將軍軍隴西北地上郡中尉周舍為衛將軍郎中令
張武為車騎將軍軍渭北車千乘騎卒十萬人上親勞
軍勒兵申教令賜吏卒

武帝本紀元封元年冬十月詔曰南越東甌咸伏其辜
西蠻北裔頗未輯睦朕將巡邊陲擇兵振旅躬秉武節
置十二部將軍親帥師焉行自雲陽北歷上郡西河五
原出長城北登單于臺至朔方臨北河勒兵十八萬騎
旌旗徑千餘里

郊祀志冬上議曰古者先振兵釋旅然後封禪遂北巡
朔方勒兵十餘萬騎還祭黃帝冢橋山釋兵涼如

地名

後漢書世祖本紀建武六年初罷郡國都尉官

劉氏敘曰郡有都尉國有中尉
此時罷郡都尉耳不應有國字

章如愚曰光武見翟義反隗囂叛皆以秋試勒車騎
誅守長以起事也是以罷郡國都尉無都試之法惟
京師肄兵如故

順帝本紀永建元年夏五月嚴飭障塞繕設屯備立秋
之後簡習戎馬冬十月庚寅遣黎陽營兵出屯中山北
界告幽州刺史令緣邊增置步兵列屯塞下調五營弩
師郡舉五人令教習戰射

注調選也五營五校也謂長水
步兵射聲胡騎屯騎五校尉

何進傳靈帝中平五年天下滋亂望氣者以為京師當
有大兵兩宮流血大將軍司馬許涼假司馬伍宏說進
曰太公六韜有天子將兵事可以威厭四方進以為然
入言之於帝於是乃詔進大發四方兵講武於平樂觀
下起大壇上建十二重五采華蓋高十丈壇東北為小

壇復建九重華蓋高九丈列步兵騎士數萬人結營爲
陳天子親出臨軍駐大華蓋下進駐小華蓋下禮畢帝
躬擐甲介馬稱無上將軍行陳三匝而還詔使進悉領
兵屯於觀下是時置西園八校尉以小黃門蹇碩爲上
軍校尉虎賁中郎將袁紹爲中軍校尉屯騎都尉鮑鴻
爲下軍校尉議郎曹操爲典軍校尉趙融爲助軍校尉
涪于瓊爲佐軍校尉又有左右校尉帝以蹇碩壯健而
有武略特親任之以爲元帥督司隸校尉以下雖大將
軍亦領屬焉

魏志武帝本紀建安十三年春正月作元武池以肄舟
師

晉書禮志獻帝建安二十一年魏國有司奏古四時講
武皆於農隙漢西京承秦制三時不講惟十月都試今

金革未偃士眾素習可無四時講武但以立秋擇吉日
大朝車騎號曰治兵上合禮名下承漢制奏可是秋閱
兵魏王親執金鼓以令進退

右漢

晉書禮志延康元年魏文帝爲魏王是年六月立秋治
兵于東郊公卿相儀王御華蓋親令金鼓之節

魏志文帝本紀黃初六年十月行幸廣陵故城臨江觀
兵

明帝本紀太和元年冬十月丙寅治兵於東郊

蜀志後主建興十年亮休士勸農於黃沙作流馬木牛
畢教兵講武

右三國

晉書武帝本紀咸寧元年十一月癸亥大閱於宣武觀

三年十一月丙戌帝臨宣武觀大閱

太康四年十二月庚午大閱於宣武觀 六年十二月

甲申大閱於宣武觀旬日而罷

禮志元帝太興四年詔左右衛及諸營教習依大習儀作鴈羽仗

成帝本紀咸和元年十一月壬子大閱於南郊

文獻通考咸甯元年太康四年六年皆大閱習眾然不自令進退自惠帝以後其禮遂廢成帝咸和中詔

內外諸軍戲兵於南郊之場故其地因名闕場自後蕃鎮桓庾諸方伯往往閱習朝廷無事焉

右晉

宋書文帝本紀元嘉二十年二月甲寅車駕於白下閱

武 二十五年春正月庚寅詔曰安不忘虞經世之所

同治兵教戰有國之恆典故服訓明恥然後少長知禁

頃戎政雖修而號令未審今宣武場始成便可刻日大

習眾軍當因校獵肄武講事

孝武帝本紀孝建二年九月丁亥車駕於宣武場閱武

大明五年二月癸巳車駕閱武詔曰昔人稱人道何先

于兵為首雖淹紀勿用忘之必危朕以聽覽餘閒因時

講事坐作有儀進退無爽軍幢以下普量班錫 七年

春正月癸未詔曰春蒐之禮著自周合講事之語書於

尊史所以昭宣德度示民軌則今歲檢氣榮中外甯晏

當因農隙葺是舊章可勉日於元武湖大閱水師并巡

江右講武校獵十一月癸巳車駕習水軍於梁山

南齊書武帝本紀永明二年八月戊申車駕幸元武湖

講武 四年閏月戊午車駕幸宣武堂詔曰今親閱六

師少長有禮領馭郡帥可量班賜 九年九月戊辰車
駕幸琅邪城講武觀者傾都普頒酒肉
陳書後主本紀至德四年秋九月甲午車駕幸元武湖
肄臚艦閱武宴羣臣賦詩
魏書昭成帝本紀建國五年秋七月七日諸部畢集設
壇塲講武馳射因以爲常
道武帝本紀登國六年秋七月壬申講武於牛川 八
年秋七月車駕臨幸新壇庚寅宴羣臣仍講武 十年
八月帝親治兵於河南
皇始元年八月庚寅治兵於東郊
天興二年秋七月辛酉大閱於鹿苑享賜各有差 五
年春正月帝聞姚興將寇邊庚寅大簡輿徒詔并州諸
軍積穀於平陽之乾壁六月治兵於東郊部分眾軍

明元帝本紀永興二年秋七月丁巳立馬射臺於陝西
仍講武教戰 五年春正月己巳大閱畿內男子十二
以上悉集己卯幸西宮頌拔大渠帥四十餘人詣闕奉
貢賜以緡帛錦罽各有差乙酉詔諸州六十戶出戎馬
一匹庚寅大閱於東郊部署將帥以山陽侯奚斤爲前
軍眾三萬陽平王熙等十二將各萬騎帝臨白登躬自
校覽焉二月戊申賜陽平王熙及諸王公侯將士布帛
各有差庚戌幸高柳川甲寅車駕還宮
太武帝本紀始光元年九月大簡輿徒治兵於東郊部
分諸軍五萬騎 二年冬十月治兵於西郊 四年夏
四月治兵講武

延和元年夏五月大簡輿徒於南郊

太平眞君九年九月乙酉治兵於西郊 十一年八月

癸未治兵於西郊

文成帝本紀興安二年九月壬子閱武於南郊

冊府元龜太安四年七月壬子詔曰朕每歲以秋月閒口命羣官講武平壤所幸之處必立宮壇糜費之功勞損非一宜仍舊貫何必改作也

文獻通考孝成帝和平三年因歲除大讎遂耀兵示武更爲制令步兵陳於南騎士陳於北各擊鐘鼓以爲節度其步兵所衣青赤黑黃別爲部隊楯稍矛戟相次周迴轉易以相赴就有飛龍騰蛇之變爲函箱魚鱗四門之陣凡十餘法跪起前却莫不應節陣畢南北二軍皆鳴鼓角衆盡大譟各令騎將六千人去來挑戰步兵更進退以相拒擊南敗北捷以爲威觀自後以爲常魏書孝文帝本紀延興四年八月戊申大閱於北郊

五年冬十月太上皇帝大閱於北郊

太和五年二月己酉講武於唐水之陽三月辛酉朔車

駕幸肆州癸亥講武於雲水之陽九月庚午閱武於南

郊大享羣臣十六年八月癸丑詔曰文武之道自古

並行威福之施必也相藉故三五至仁尙有征伐之事

夏殷明叡未舍甲兵之行然則天下雖平忘戰者殆不

教民戰可謂棄之是以周立司馬之官漢制將軍之職

皆所以輔文強武威肅四方者矣國家雖崇文以懷九

服修武以甯八荒然於習武之方猶爲未盡今則訓文

有典教武闕然將於馬射之前先行講武之式可勅有

司豫修場塲其列陣之儀五戎之數別俟後勅十八

年八月丁未幸閱武臺臨觀講武十九年春正月壬

午講武於汝水之西大賚六軍二十年九月戊辰車

駕閱武於小平津癸酉還宮 二十二年二月庚寅行
幸樊城觀兵襄沔耀武而還

宣武帝本紀景明三年九月丁巳車駕行幸鄴戊寅閱
武於鄴南

隋書禮儀志後齊常以季秋皇帝講武于都外有司先
萊野爲場爲二軍進止之節又別墀於北場輿駕停觀
遂命將簡士教眾爲戰陣之法凡爲陳少者在前長者
在後其還則長者在前少者在後長者持弓矢短者持
旌旗勇者持鉦鼓刀楯爲前行戰士次之戟槊者次之
弓箭爲後行將帥先教士目使習見旌旗指揮之蹤發
起之意旗卧則跪教士耳使習金鼓動止之節聲鼓則
進鳴金則止教士心使知刑罰之苦賞賜之利教士手
使習持五兵之便戰鬪之備教士足使習跪及行列嶮

泥之塗前五日皆請兵嚴於場所依方色建旗爲和門
都墀之中及四角皆建五采牙旗應講武者各集于其
軍戒鼓一通軍士皆嚴備二通將士貫甲三通步軍各
爲直陳以相俟大將各處軍中立旗鼓下有司陳小駕
鹵簿皇帝武弁乘革輅大司馬介冑乘奉引入行殿百
司陪列位定二軍迭爲客主先舉爲客後舉爲主從五
行相勝法爲陣以應之

周書太祖本紀大統三年進太祖柱國大將軍 五年
冬大閱於華陰 九年冬十月大閱於櫟陽還屯華州
十年冬十月大閱於白水 十一年冬十月大閱於
白水遂西狩岐陽

武帝本紀保定二年冬十月辛亥帝御大武殿大射公
卿列將皆會戊午講武於少陵原

天和三年冬十月丁亥上親率六軍講武於城南京邑
觀者輿馬彌漫數十里諸蕃使咸在焉 六年冬十月
壬寅上親率六軍講武于城南

建德元年十一月丙午上親帥六軍講武城南 二年

十一月辛巳帝親率大軍講武於城東癸未集諸軍都
督以上五十人於道會苑大射帝親臨射宮大備軍容

三年六月丁未集諸軍將教以戰陣之法十月丙辰
行幸同州十一月己巳大閱於城東十二月癸卯集諸

軍講武於臨皋澤

宣帝本紀宣政元年十一月己亥講武於道會苑帝親
擐甲胄

右南北朝

隋書文帝本紀開皇二年十二月辛未上講武於後園

煬帝本紀大業五年四月癸亥出臨津關渡黃河至西
平陳兵講武

通典隋大業七年征遼東眾軍將發御臨朔宮親授節
度每軍大將亞將各一人騎兵四十隊隊百人

團有偏將一人第一團皆青絲連光甲鐵具裝青纓拂建後現旗第一團絳絲連
珠犀甲獸文具裝赤纓拂建前旗第三團白絲連光明甲鐵具裝素纓拂建碎
邪旗第四團烏絲連元犀甲獸文具裝建六駁旗前部鼓吹一部大鼓小鼓及鼙
長鳴中鳴等各十八具柷鼓金鉦各二具後部鑼吹一部鑼二面歌蕭及笛各四
具節鼓一面篳篥橫笛
各四具大角十八具又步卒八十隊分為四團團有偏將一

人第一團每隊給青隼盪幡一第二團每隊給黃隼盪幡一第三團每隊給
蒼隼盪幡一第四團每隊給烏隼盪幡一長槊槊各及甲胄等各稱兵數受
降使者一人 給二馬輜車一乘白獸幡及節每
一騎吏三人車輜白從十二人 承詔慰撫不受大

將節制戰前則為監軍軍將發候大角一通步卒第一
團出營東門東向陣第二團出營南門南向陣第三團

出營西門西向陣第四團出營北門北向陣陣四面團
營然後請團嚴駕立大角三通則鑿鼓俱振第一團引

行隊間相去各十五步次第二團次前部鼓吹次弓矢一隊各二百騎建蹲獸旗爬槩二張大將在其次韃馬二十四次大角次後部鑊吹次第三團次第四團次受降使者次及輜重戎車散兵等亦有四團第一輜重出收東面陣分爲兩道夾以行第二輜重出收南面陣夾以行第三輜重出收西面陣夾以行第四輜重出收北面陣夾以行亞將領五百騎建騰豹旗殿軍後至營則第一團騎陣於東面第二團騎陣於南面鼓吹羽大將軍居中駐馬南向第三團騎陣於西面第四團騎陣於北面合爲方陣四方外向步卒翊輜重入於陣內以次安營定四面陣者引入營亞將率驍騎遊奕督察其安營之制以車外布間設馬槍次施兵幕安內雜畜事畢大將亞將等各就牙帳馬步陣與軍中散兵交爲兩番

五日而代於是每一日遣一軍發相去四十里連營漸進二十四日續發而進首尾相繼鼓角相聞旌旗互九百六十里天子六軍次發兩部前後先置又互八十里通諸道合三十軍互千四十里諸軍各以帛爲帶長尺五寸闊二寸題其軍號爲記御營內者合十衛三臺五省九寺並分隸內外前後左右六軍亦各題其號不得自言臺省王公以下至於兵馬私隸悉以綴於衣領名軍記帶諸軍並給幡數百有餘事使人交相去來執以行執幡而離本軍者他軍驗記帶知非本部兵則所在斬之

蕙田案此爲征遼東事當屬出師然其儀節實係將出兵之前先定其訓練簡閱之禮也

右隋

唐開元禮皇帝講武仲冬之月講武於都外前期十有
一日所司奏講武兵部承詔遂命將帥簡軍士有司先
芟萊除地爲場方一千二百步四出爲和門又於其內
墀地爲步騎六軍營域處所左右廂各爲三軍皆上軍
在北中軍次之下軍在南東西相向中間相去三百步
五十步立表行凡立五行表間前後各相去五十步爲
三軍進止之節又別墀地於北廂南向爲車駕停觀之
處前三日尚舍奉御設大次及御座於其中如常儀前
一日講武將帥及士卒集於墀所禁止諠譁依方色建
旗爲和門於都墀之中及四角皆建以五綵牙旗旗鼓
甲仗威儀悉備於墀所大將以下各有統帥如常式步
軍大將被甲胄乘馬教騎大將亦乘馬教習士衆爲戰
陣之法講武日未明七刻搥一鼓爲一嚴侍中奏開宮

殿門及城門未明五刻搥二鼓爲再嚴侍中版奏請中
嚴文武官應從者俱先置文武官皆公服所司爲小駕
依圖陳設未明二刻搥三鼓爲三嚴諸衛各督其隊與
鈚戟以次入陳於殿庭諸侍衛之官各服其器服諸侍
臣俱詣西階下奉迎侍中負
壘如式乘黃令進革輅於太極殿前
皇帝服武弁之服餘並如圜丘儀駕至墀所兵部尚書
介冑乘馬奉引至講武所入自都墀北和門兩步軍之
北當空南向黃門侍郎奏稱請降輅還侍位皇帝降輅
入大次而觀兵部尚書停於東廂西向三仗小退以通
觀路領軍減小駕騎士立於都墀之四周侍臣依左右
廂立於大次之前東西面北上文武九品以上皆公服
文東武西在侍臣之外十步重行北上諸州使人及蕃
客先集於都墀北和門外東方南方立於道東西方北

方立於道西皆向輅而立以北爲上駕至和門奉禮曰
再拜在位者皆拜訖皇帝入次謁者引諸州使人鴻臚
卿引蕃客東方南方立於大次東北南向以西爲上西
方北方立於大次西北南向以東爲上若有觀者立於
都墀騎士仗外四周任意然後講武諸州使人及蕃客
立定吹大角三通中軍將各以鞞命鼓二軍俱擊鼓三
鼓有司偃旗鼓步卒皆跪二軍諸帥果毅以上各集於中
軍大將旗鼓之下左廂中軍大將立於旗鼓之東西面
諸軍將立於旗鼓之南北面東上右廂中軍大將立於
旗鼓之西東面諸軍將立於旗鼓之南北面西上以聽
誓大將誓曰今行講武以教人戰進退左右一如軍法
用命有常賞不用命有常刑可不勉之誓訖左右三軍
各長史二人振鐸分循以警眾諸果毅各以誓詞通告

其所部遂擊鼓有司舉旗士眾皆起騎從皆行及表擊
鉦騎從乃止又擊三鼓有司偃旗士眾皆跪又擊有司
舉旗士眾皆起騎驟徒趨及表乃止整列位定東軍一
鼓舉青旗爲直陣西軍亦鼓而舉白旗爲方陣以應之
次南軍亦鼓而舉赤旗爲銳陣北軍亦鼓而舉黑旗爲
曲陣以應之次東軍鼓而舉黃旗爲圓陣西軍亦鼓而
舉青旗爲直陣以應之次西軍鼓而舉白旗爲方陣東
軍亦鼓而舉赤旗爲銳陣以應之次東軍鼓而舉黑旗
爲曲陣西軍亦鼓而舉黃旗爲圓陣以應之凡陣迭爲
主客先舉者爲客後舉者爲主從五行相勝之法爲陣
以應之每變陣二軍各選刀楯之士五十人挑戰於兩
軍之前第一第二挑戰迭爲勇怯之狀第三挑戰爲敵
均之勢第四第五挑戰爲勝敗之形每將變陣先鼓而

爲直陣然後變從餘陣之法五陣畢兩軍俱爲直陣又擊三鼓有司偃旗士眾皆跪又擊鼓舉旗士眾皆起騎馳徒走左右軍俱至中表相擬擊而還每退至一行表跪起如前遂復本列侍中跪奏請觀騎軍又侍中稱制曰可侍中俛伏興二軍吹角擊鼓誓眾俱進及表乃止皆如步軍唯無跪起耳騎軍東西迭爲主客爲五變之陣皆如步軍之法每陣各八騎挑戰於兩陣之間如步軍法五陣畢俱大擊鼓而前盤馬相擬擊而罷遂振旅而還凡步騎二軍之士備則滿數省則半之損益隨時唯不得減將帥凡相擬擊皆不得以刃相及凡步士逐退過中表二十步而止不得過也騎士不在此例若因田親到如別禮許並乘輅振旅而還如常儀講武罷侍中跪奏稱侍中臣具言講武禮畢請還俛伏興皇帝降御輿侍衛如常

儀皇帝升輅太僕卿立授綬升訖勅車右升千牛將軍升輅陪乘黃門侍郎奏請鑾駕發引以下如圖丘還宮儀唯不作鼓吹不撞鞮寶解嚴訖將士各還明日羣官奉參起居如別儀

蕙田案以上開元禮與隋書禮儀志有同者今刪併又見唐書禮樂志亦不復復載

唐書兵志每歲季冬折衝都尉率五校兵馬之在府者置左右二校尉位相距百步每校爲步隊十騎隊一皆卷稍幡展刃旗散立以俟角手吹大角一通諸校皆斂人騎爲隊二通偃旗稍解幡三通旗稍舉左右校擊鼓二校合譟而進右校擊鉦隊少卻左校進逐至右校立所左校擊鉦隊少卻右校進逐至左校立所右校復擊鉦隊還左校復薄戰皆擊鉦隊各還大角復鳴一通皆

卷幡攝矢施弓匣刃二通旗稍舉隊皆進三通左右校皆引還

蕙田案開元禮所載天子親自臨閱京師所行也兵志所載折衝都尉臨閱郡國所行也

唐書高祖本紀武德元年十月辛丑大閱

冊府元龜唐高祖武德元年十月詔曰安人靜俗文教爲先禁暴懲凶武畧斯重比以喪亂日久黎庶凋殘是用務本勸農冀在豐贍而人蠹未盡寇盜尙繁欲暢兵威須加練習今農收已畢殺氣方嚴宜順天時申耀威武可依別勅大集諸軍朕將躬自循撫親臨校閱

舊唐書高祖本紀武德五年十一月丙申幸宜州簡閱

將士 八年十一月辛卯如宜州庚子講武於同官

九年三月幸昆明池習水戰

太宗本紀武德九年八月癸亥高祖傳位於皇太子太宗卽位九月丁未引諸衛騎兵統將等習射於顯德殿庭謂將軍以下曰自古突厥與中國更有盛衰若軒轅善用五兵卽能北逐獯鬻周宣馳驅方召亦能制勝太原至漢晉之君逮於隋代不使兵士素習干戈突厥來侵莫能抗禦致遣中國生民塗炭於寇手我今不使汝等穿池築苑造諸淫費農民恣令逸樂兵士惟習弓馬庶使汝鬪戰亦望汝前無橫敵于是每日引數百人於殿前教射帝親自臨試射中者隨賞弓刀布帛朝臣多有諫者曰先王制法有以兵刃至御所者刑之所以防萌杜漸備不虞也今引裨卒之人彎弧縱矢於軒陛之側陛下親在其間正恐禍出非意非所以爲社稷計也上不納自是後士卒皆爲精銳

唐書太宗本紀貞觀八年十二月丁卯從太上皇閱武於城西

舊唐書高祖本紀貞觀八年是歲閱武於城西高祖親自臨視勞將士而還

唐書高宗本紀顯慶二年十一月乙巳獵于滎南王子講武於新鄭

唐會要高宗顯慶二年十一月二十一日講武於滎水

之南行三驅之禮上設次於尚書臺以觀之

許州長史封道安奏言後漢南

郡太守馬融講尚書于此因五年三月八日又講武於并州城北

為各令講武為觀武臺從之上御飛閣羣臣臨觀之左衛大將軍張延師為左軍左

右驍武等六衛左羽林騎士屬焉左武衛大將軍梁建

方為右軍左右威武等六衛右羽林騎士屬焉一鼓而

誓眾再鼓而整列三鼓而交前左為曲直圓銳之陣右

為方銳直圓之陣三挑而五變步退而騎進五合而各

復許敬宗奏曰延師整而堅建方敢而銳皆良將也上

曰講閱者安不忘危之道也梁朝衣冠甚盛人物亦多

侯景以數千人渡江一朝瓦解武不可贖人不可棄此

之謂也

元龜

蕙田案此事亦見新唐書高宗本紀及冊府

冊府元龜麟德二年四月丙寅講武於邙山之陽帝御

城北門樓以觀之

文獻通考武太后聖歷二年欲以季冬講武有司請延

至孟春王方慶上疏曰謹案禮記月令孟冬之月天子

命將帥講武習射御角力此乃三時務農一時講武蓋

王者常事安不忘危之道也孟春之月不可以稱兵者

五禮通考卷三十一 校閱

七

兵金也金性克木春盛德在木金氣以害盛德逆生氣
孟春行冬令則水潦為敗霜雪大摯首種不入案蔡邕
月令章句太陰休少陽尚微而行冬令以道水氣故水
潦至而敗生物也雪霜大摯摧傷物也太陰于時雨雪
而霜故傷首種謂宿麥也麥以秋種故謂之首種今孟春講武是行冬令以
陰犯陽氣害發生之德臣恐水潦敗物霜雪損稼宿麥
不登無所收入也請至明年孟冬教習以順天道從之
冊府元龜元宗先天二年十月癸亥親講武於驪山之
下徵兵二十萬旌旗連亙五十餘里戈鋌金甲照耀天
地列大陣於長川坐作進退以金鼓之聲節之三軍出
入號令如一帝親擐戎服持沈香大鎗立于陣前威振
宇宙長安士庶奔走縱觀填塞道路兵部尚書郭元振
以虧失軍容坐於蘇下將斬之宰相劉幽求張說跪於

馬前諫曰元振翊戴上皇有大功於國雖犯軍令不可
加刑伏願寬宥以從人望帝乃赦之配流新州給事中
知禮儀事唐紹以草軍儀有失坐於蘇下斬之禮畢乃
下制曰傳不云乎兵之設久矣所以威不軌而昭文德
聖人以興亂人以廢皆兵之由也故文事必有武備耀
德在於觀兵所以外清蠻貊內輯華夏其經濟之致歟
自有隋失道三靈改卜我唐受命百姓與能四罪而天
下服一戎而天下定航海梯山罔不率俾休牛歸馬永
不復用德逮羣物刑清百年然而制軍為旅先王分職
在祀與戎前史垂訓則未學也孰可棄之往以韋氏構
逆兇魁作禍則我之宗祀危如綴旒故斬長蛇截封豨
戮梟獍掃欃槍使武之不修則兆人何父朕以薄德皆
奉聖謨濟邦家之多難畏君父之嚴旨自撫茲億兆若

五德道卷之三 校閱

臨淵谷雖重譯雲歸和親日至遂五兵之不教慮七德之未康今蓋元冬戒時農事爰隙驪山之下鴻門在望橫層阜以南屬耿長川而北流嚴霜初隕疾風始至以時而命羣帥得地以講武功料其勝負詳其進退以振國威用蒐軍實故披堅執銳千戈有容練卒陳師金鼓有節上應於天也下順於人也三光之靈可接五行之德斯用將孫吳不遠頗牧同時非熊所期怒蛙亦勸布三令調九章且閱宣場之儀若觀莘墟之禮情兼慰賞義宏寵錫惟此畿甸比經水旱總集士馬頗有煩勞中念元元更資勤恤其講武使各賜物一百段將軍各八十段中郎將各六十段郎將及左右軍長史各四十段折衝果毅各三十段押官六品以下各二十段新豐百姓宜免來年地稅置頓使賜物一百段緣頓踏踐麥苗

給米酬直

開元二年八月辛巳上以河隴之故命有司大募壯勇士從軍既募引見置酒於朝堂享之詔曰朕光宅四海撫御百蠻屬疆場未甯軍國多費每欲指揮方畧親率軍師故召募爾等擬從朕行知爾等材力冠羣藝能拔萃但以不教人戰豈知金鼓之聲授以兵律方辨干戈之勢所以且遣薛訥等於隴右防禦使令教習爾等既練韜鈴須明隊伍使投石拔劍以勵威鋒裹糧坐甲待清逋寇若能因機立效遇敵邀勲酬以官榮必超格例然後陪朕輿駕從戎塞垣俾爾先驅敬聽後命今宴勞爾等并賜錢三千貫可節級領取卽宜好去十月薛訥克吐蕃帝遂停親征詔曰比來緣邊鎮軍每年更代兵不識將將不識兵豈有緣路疲人蓋是以卒與敵其以

西北軍鎮宜加兵數先以側近兵人充並精加簡擇其有勞考等色所司其以條例奏聞戰兵別簡為隊伍專令教練不得輒有使役仍令兵部侍郎裴瓘太常少卿姜晦往軍州計會便簡支配有見集後軍兵宜令兵部侍郎韋抗紫微舍人王珽即簡擇以聞

八年八月詔曰國家偃武教修文德百年於茲矣自運屬清平人忘爭戰俎豆之事嘗聞之矣軍戎之禮我所未暇且五材並用誰能去兵四方雖安不可忘戰故周禮以軍禁糾邦國以蒐狩習戎旅不教人戰是為棄之宜差使於兩京及諸州且揀取十萬人務求灼然驍勇不須限以蕃漢皆放番役差科惟令團伍教練辨其旗物簡其車徒習攻取進退之方陳威儀貴賤之等俾夫少長有禮疾徐有節將以伐叛懷服將以保大定功叶

于師貞以宏武備應須集期及有蠲免所司明為條制別作優異法奏聞仍勅幽州刺史邵寵於幽易兩州選二萬灼然驍勇者充幽州經畧軍健兒不得雜使租庸資課並放免

肅宗至德二載八月帝在鳳翔癸巳六軍大閱帝御府城樓觀軍陣之容

舊唐書肅宗本紀至德三載正月庚寅大閱諸軍於含元殿庭上御樓鸞閣觀之

冊府元龜代宗寶應元年九月壬寅大閱兵馬於鳴鳳門街

舊唐書代宗本紀大歷九年四月乙酉詔郭子儀等大閱兵師以備吐蕃

德宗本紀貞元十六年春正月庚子朔乙巳上閱兵於

麟德殿前

冊府元龜宣宗大中五年五月勅如聞諸道軍將及官健兒等近日所在將帥多務因循當召募之時已不選擇及收補之後曾莫教招遂使名在戎行少能知其弓矢職居列校罕見識於韜鈴緩急忽有徵差便取現在應數惟憂就役豈暇圖功虛費資糧莫克備敵為弊頗久須有舉明自今以後委諸道觀察節度都防禦團練經畧等使每道慎擇會兵法及能弓馬解槍弩及筒射等軍將兩人充教練使每年至合教習時分番各以本藝閱試其間或有伎藝超異者量加優賞仍作等第節級與進改職名每至年終都具所教習馬步及各執所藝人數申兵部及中書門下仍委兵部簡勘都開件奏聞所冀各盡伎能自成勁銳其支部有兵處亦委本道

點簡訓練准詔處分

右唐

五代史梁太祖本紀開平元年冬十月己未講武於繁臺

霍存傳太祖已即位閱騎兵於繁臺顧諸將曰使霍存在豈勞吾親閱耶諸軍甯復思之乎它日語又如

此

開平四年春正月丁未講武於榆林

乾化元年八月戊寅大閱於興安鞠場冬十月丙子大

閱於魏東郊

唐莊宗本紀天祐十有五年八月大閱於魏東郊

冊府元龜明宗天成二年十月癸未御興教門觀兵自

卯至午隊伍方絕

五世皇朝三皇 校閱

三

晉高祖天福二年十月勅習戰講武歷代通規選士練兵其來舊制宜以每年農隙時講武仍准令式處分五代史晉出帝本紀開運元年春正月辛卯講武於瀘州二年二月丙子大閱於戚城周世宗本紀顯德元年三月壬辰次澤州閱兵於北郊

右五代

宋史禮志閱武仍前代制太祖太宗征伐四方親講武事故不盡用定儀亦不常其處鑿講武池朱明門外以習水戰復築講武臺城西楊村秋九月大閱與從臣登臺觀焉真宗詔有司擇地含輝門外之東武村爲廣場馮高爲臺臺上設屋構行宮其夜三鼓殿前侍衛馬步諸軍分出諸門詰帝乘馬從官並戎服賜以窄袍至行宮諸軍陣臺前左右相向步騎交屬互二十里諸班

衛士翼從于後有司成列帝升臺東向御戎帳召從臣坐觀之殿前都指揮使執五方旗以節進退又於兩陣中起候臺相望使人執旗如臺上之數以相應初舉黃旗諸軍旅拜舉赤旗則騎進舉青旗則步進每旗動則鼓馘大譟聲震百里外皆三挑乃退次舉白旗諸軍復再拜呼萬歲遂舉黑旗以振旅軍於左者畧右陣以還由臺前出西北隅軍於右者畧左陣以還由臺前出西南隅並凱旋以退乃召從臣宴教坊奏樂回御東華門閱諸軍還營鈞容奏樂於樓下復召從臣坐賜飲明日又賜近臣飲於中書諸軍將校飲於營中內職飲於軍器庫諸班衛士飲於殿門外兵志訓練之制禁軍月奉五百以上皆日習武技三百以下或給役或習技其後別募廂兵亦閱習武技號教

閱廂軍成川廣者舊不訓練嘉祐以後稍習焉凡諸日習之法以鼓聲爲節騎兵五習步兵四習以其坐作進退非施於兩軍相當者然自宋初以來諸軍皆用之宋史太祖本紀建隆元年十一月丁未命諸軍習戰艦於迎鑾三年十月丙戌幸太清觀遂幸造舡務觀習水戰已亥幸岳臺命諸軍習騎射乾德元年四月庚寅出內錢募諸軍子弟鑿習戰池乙巳幸玉津園閱諸軍騎射六月巳酉命習水戰於新池七月丁卯幸武成王廟遂幸新池觀習水戰交獻通考開寶九年四月幸金明池習水戰上御水心殿命從臣列坐以觀戰艦角勝鼓譟以進往來馳突爲迴旋擊刺之狀顧謂侍臣曰兵棹之技南方之事也今已平定固不復用但時習之不忘武功耳迄眞宗朝歲

習不輟

太宗本紀太平興國二年秋九月辛亥幸講武臺大閱

崔翰傳太平興國二年秋講武於西郊時殿前都指

揮使楊信病瘖命翰代之翰分布士伍南北綿亙二

十里建五色旗號令將卒望其所舉以爲進退六師

周旋如一上御臺臨觀大悅以藩邸時金帶賜之謂

左右曰晉朝之將必無如崔翰者

文獻通考太平興國二年將伐太原詔築講武臺於西

郊九月大閱上與從官登而觀焉是冬又觀飛山兵射

連弩發機石於臺下

宋史太宗本紀太平興國五年三月庚午幸講武池觀

習樓舡十二月甲戌大閱遂宴幄殿

山堂攷索太平興國九年上親閱諸軍參考勞績升

校閱

三

四等自二石八斗至二石五斗以次閱習詔行之陝西河東河北路是歲詔教士不祗帶金革緩急不足以應敵自今諸軍各予鎧甲十馬甲五令迭披帶又命諸軍班聽習雜武技勿輒禁止

慶厯元年徙邊兵不教者於內郡俟習武技即遣戍邊二年諸軍以射親踈爲賞罰中的者免是月諸役仍籍其名闕校長則按籍取中多者補樞密直學士楊楷請教騎兵止射九斗至七斗三等弓畫的爲五量去的二十步引滿即發射中者視量數給錢爲賞騎兵佩劈陣刀訓練時以木桿代之奏可四年詔騎兵帶甲射不能發矢者奪所乘馬與本營藝優士卒韓琦言教射惟事體容及彊弓不習射親不可以臨陣臣至邊嘗定弓弩挽彊蹠硬射親格願行諸軍立賞肄習歲以春秋

二時各一閱諸營先上射親吏卒之數命近臣與殿前馬步軍司閱之其射親入第四至第七等量先給賜入第三等以上及挽彊蹠硬中格悉引對親閱等數多者其正副指揮使亦第賜金帛詔以所定格班教諸軍四年遣官以陝西陣法分教河北軍士五年密詔益利梓夔路鈐轄司以弓弩習士卒候民間觀聽寢熟即便以短兵日教三十人十日一易知并州明鎬言近臣籍諸營武藝之卒使帶甲試充奇兵外爲三等庶幾主將悉知軍中武技強弱臨敵可用詔頒其法三路范仲淹請以帶甲射一石充奇兵餘自九斗至七斗第爲三等射力及等即升之詔著爲令六年詔諸軍夏三月毋教弓弩止習短兵又詔以春秋大教弓射一石四斗弩曠三石八挺槍刀手勝二人者立爲武藝出眾格中者

本營闕階級卽以次補

至和元年詔諸軍選將校武藝以射親爲上韓琦又言奉詔軍士弩彊四石二斗并弓箭槍手應舊規選中者卽給挺補守闕押官然則排連舊制爲虛文矣請三路兵遇春秋大教武技出眾者優給賞物免本營他役候階級闕如舊制選補奏可

仁宗本紀嘉祐二年七月辛巳詔河北諸道總管分遣兵官教閱所部軍

兵志治平二年詔河北戰卒三十萬一千陝西四十五萬九百并義勇等委總管司訓練毋得冗占

神宗熙甯元年詔曰國家置兵以備戰守而主官之兵冗占者眾肄習弗時或誤軍事帥臣按撫監司其察所部有占兵不如令者以聞十月樞密院請陝西河東選

三班使臣及士人任殿侍者以爲河北諸路指使教習騎軍或言河朔兵有教閱之名而無其實請班教法於其軍久而弗能者罷爲廂軍奏可二年帝嘗語執政並邊訓練士卒何以得其精熟安石對曰京東所教兵已精強願陛下推此法以責邊將問詔其兵親臨閱試訓練簡閱有不如詔者罰之而賞其能者賞不遺賤罰不避貴則法行而將吏加勸士卒無不奮勵矣九月選置指使巡教諸軍殿前司四人馬步軍司各三人

山堂攷索神宗熙甯二年樞密院言廂軍近已團結教閱武藝欲給威邊指揮請以州軍大小定人數自三百人至百人仍改軍額淮南曰壯武江南曰雄武荆湖曰靜江兩浙曰崇節福建曰保節並加教閱二字於軍額上從之

宋史兵志熙甯三年帝親閱河東所教排手進退輕捷
不畏矢石遂詔殿前司步軍指揮當出戍者內擇槍刀
手伉健者百人教如河東法藝精者役使以優獎之
五年四月詔在京殿前馬步諸軍巡教使臣並以春秋
分行校試射命中者第賜銀牒兵房置籍考校以多少
定殿最五月詔以涇原路蔡挺衙教陣隊於崇政殿引
見仍頒諸路其法五伍爲隊五隊爲陣陣橫列騎兵二
隊亦五伍列之其出皆以鼓爲節束草象人而射焉中
者有賞馬步皆前三行槍刀後二行弓弩附隊以虎蹲
弩牀子弩各一射與擊刺迭出皆聞金卽退預籍人馬
之彊者隱於隊中遇可用則別出爲奇帝以其點閱周
悉常有出野之備故令頒行

李氏燾長編神宗閱左藏庫副使并斌所教牌于於

崇政殿乃命殿前步軍司擇驍健者依法教習自是
營屯及更戍諸軍畿甸三路民兵皆隨伎藝召見親
閱焉凡閱試禁衛戍軍民兵總率第其精拙賜以金
帛而超等高者至命爲吏選官其典領者優加職秩
涇原經畧蔡挺肄習諸將軍馬點閱周悉隊伍有法
入爲樞密副使因言於上而引試之舊以七軍營陣
校試而分數不齊前後牴牾命校試官采綴定爲八
軍法及軍法成頒行諸路既又定九軍法以一軍營
陣卽城南好草坡閱之皆有賞賚其按閱砲場連弩
及便坐日閱召募新軍時令習戰如故事

文獻通考神宗諭近臣曰黃帝始置八陣法敗蚩尤於
涿鹿諸葛亮造八陣圖於魚復平沙之上壘石爲八行
晉桓溫見之曰常山蛇勢也文武皆莫能識之此卽九

軍陣法也後至隋韓擒虎深明其法以授其甥李靖靖
以時遇久亂將臣通曉其法者頗多故造六花陣以變
九軍之法使世人不能曉之大抵八陣即九軍九軍者
方陣也六花陣即七軍七軍者圓陣也蓋陣以圓為體
方陣者內圓而外方圓陣即內外俱圓矣故以圓物驗
之則方以八包一圓以六包一此九軍六花陣之大體
也六軍者左右虞候軍各一為二虞候軍左右廂各二
為四廂軍與中軍共為七軍八陣者加前後二軍共為
九軍本朝祖宗以來置殿前馬步軍三帥即中軍前後
軍帥之別名而馬步軍都虞候是為二虞候軍天武捧
日龍神衛四廂是為四廂軍也中軍帥總制九軍即殿
前都虞候專總中軍一軍之事務是其名實與古九軍
及六花陣相符而不少差也今論兵者俱以唐李筌太

白陰經中所載陣圖為法失之遠矣朕嘗覽近日臣僚
所獻陣圖皆妄相眩惑無一可取果如此輩之說則兩
敵相遇必須遣使豫約戰日擇一寬平之地仍夷阜塞
壑誅草伐木如射圃教場方可盡其法耳以理推之知
其不可用也決矣今可約李靖法為九軍營陣之制然
李筌之圖乃營法非陣法也朕採古之法酌今之宜曰
營曰陣本出於一法而已止曰營行曰陣在奇正言之
則營為正陣為奇也於是八月大閱九軍陣於城南
荆家陂已事拆營回軍賜遂等以下指揮馬步諸軍銀
絹有差

宋史兵志六年詔河北四路承平日久重於改作遂因
循益隳軍制其以京東武衛等六十二營隸屬諸路分
番教習餘兵並分遣主兵官訓練九月詔自今巡教使

臣校殿最難以十分爲率其事藝第一等及九分以上或射親及四分雖殿除其罰第二等事藝及八分或射親不及三分雖最削其賞十月選涇原士兵之善射者以教河朔騎軍馳驟野戰帝曰裁併軍營凡省軍員四千餘人此十萬軍之資也儻訓練精勇人得其用不惟勝敵亦以省財安石等曰陛下頻年選擇使臣專務訓練間御便殿躬親試閱賞罰既明士卒皆奮觀其技藝之精一人爲數夫之敵此實國家安危所繫也是時帝初置內教法旬一御使殿閱武校程其能否而勸沮之士無不爭勸者七年詔教閱戰法主將度地之形隨宜施行二月詔自今歲遣一使按視五路安撫使以下及提舉教閱諸軍兼勇保甲官課其優劣以聞而誅賞之七年命呂惠卿曾孝寬比校三五結隊法十月以

新定結隊法并賞罰格及置陣形勢等遣近侍李憲付趙高曰陣法之詳已令憲面諭今所圖止是一小陣卿其從容析問憲必一一有說然置陣法度久失其傳今朕一旦據意所得率爾爲法恐有未盡宜無避忌但具奏來繼又詔曰近令李憲齋新定結隊法并賞罰格付卿同議可否因以團立將官更置陣法卿必深悉朝廷經畫之意如近日可了宜令李憲齋赴關高奏曰置陣之法以結隊爲先李靖以五十人爲一隊每三人自相得者結爲一小隊合三小隊爲一中隊合五中隊爲一大隊餘押官隊頭副隊頭左右兼旗五人卽充五十並相依附今聖制每一大隊合五中隊五十人爲之中隊合三小隊九人爲之小隊合三人爲之亦擇心意相得者又選壯勇善槍者一人爲旗頭令自擇如已藝心相

得者二人爲左右，兼自選勇悍者一人爲引戰，又選軍校一人執刀在後爲擁隊。凡隊內一人用命，二人應援。小隊用命，中隊應援；中隊用命，大隊應援；大隊用命，小隊應援。如逗撓觀望，不卽赴救，致有陷失者，本隊委擁軍校次隊委本轄隊將審覲不救所由，斬之。其有不可救或赴救不及，或身自受敵體被重創，但非可救者，皆不坐其說。雖與古同，而用法尤爲精密。此蓋陛下天賜勇智不學而能也。然議者謂四十五人而一長，不若五人而一長之密，且以五人而一長，卽五十人而十長也。推之于百千萬，則爲長者多而統制不一也。至如周制五人爲伍，屬之比長五伍爲兩，屬之間胥四兩爲卒，屬之族師五卒爲旅，屬之黨正五旅爲師，屬之州長五師爲軍，屬之命卿此猶今之軍制百人爲都，五都爲營，五

營爲軍，十軍爲廂，自廂都指揮而下各有節級有員品。亦昔之比長間胥族師黨正之任也。議者謂什伍之制於都法爲便，然都法恐非臨陣對敵決勝之術也。况八陣之法久失其傳，聖制一新，稽之前聞，若合符節。夫法一定，易以制人，敵好擊虛，吾以虛形之；敵好背實，吾以實形之；然而所擊者非其虛，所背者非其實，故逸能勞，之飽能飢之。此所謂致人而不致於人也。七月詔諸路安撫使各具可用陣隊法及訪求知陣隊法者以聞。九月崇儀使郭固以同詳定古今陣法賜對。於是內出攻守圖二十五部付河北。

蕙田案志稱太宗選州兵壯勇者補禁衛，餘畱本城。於是兵勢重於內，輕於外。本城但更戍而不教閱矣。故陳傅良言熙甯按天下廂

軍之籍五十萬人皆不足戰而教閱之法起
 教閱者拔之廂軍之中而排立在此糧禁軍
 之下於是禁軍始遍天下然吾觀神宗教閱
 之法如此其詳矯前人之弊防兵力之弱如
 此其至而當時如王韶輩僅能小得志於南
 詔瀘夷而已至以當西夏動輒敗北李復圭
 李信劉甫挫衄於前韓絳种諤李憲高遵裕
 王中正劉昌祚徐禧曲珍等喪師於後諸將
 濫邀功賞皆以城築而已然則當日教閱亦
 徒有其名未嘗獲一勁旅之用也故太宗之
 失失在畧外而不在置禁軍之多神宗之失
 失在務名而不在更廂兵之制

八年詔在京諸軍營屯迫隘馬無所調習比勅四教場

益寬大可以馳騁其令騎軍就教者日輪一營以馬走
 驟閱習五月臧景陳馬射六事一順驥直射二背射三
 盤馬射四射親五野戰六輪弄各為說以曉射者詔依
 此教習八月帝令曾孝寬視教營陣大閱八軍陣於荆
 家陂訖事大賞

神宗本紀熙甯九年十月乙未詔東南諸路教閱新軍
 兵志元豐元年十月詔立在京校試諸軍技藝格第為
 上中下三等步射六發而三中為一等二中為二等一
 中為三等馬射五發驟馬直射三矢背射二矢中數等
 如步射弩射自六中至二中牀子弩及砲自三中至一
 中為及等並賞銀有差槍刃并標排手角勝負計所勝
 第賞其弓弩墜落或縱矢不及棚或挽弓破體或局而
 不張或矢不滿或弩蹠不上牙或獲不發或身倒足落

並為不合格卽射已中賞餘箭不合格者降一等無可
降者罷之是月賈逵燕達等言近者增損東南排弩隊
法與東南所用兵械不同請止依東南隊法以弩手代
小排若去敵稍遠則施箭近則左手持弩如小排架隔
右手執刀以備斬伐與長兵相參為用詔可其槍手仍
以標排兼習十一月西京將劉元言馬軍教習不成請
降步軍又不成降廂軍乃下令諸軍約一季不能學者
如所請降之十二月詔開封府界京東西將兵十人以
一人習馬射受教於中都所遣教頭在京步軍諸營弓
箭手亦十人以一人習馬射受教於教習馬軍所藝成
則展轉分教於其軍 二年四月遣內侍石得一閱視
京西第五將所教馬軍五月得一言其教習無狀詔本
將陳宗等具析宗等引罪帝責曰朝廷比以四方驕悍

為可虞選置將臣分總禁旅俾時訓練以待非常至於
部勒規模悉經朕慮前後告戒已極周詳使宗等稍異
木石亦宜畧知人意尸祿日久既頑且慵苟遂矜寬實
難勵眾可並勒停是月詔殿前步軍司兵各置都教頭
掌隸教習之事弩手五營弓箭手十營槍刀槍標排手
五營各選一人武藝優者奏補逐司各舉散直二人為
指使罷巡教使臣是日詔河東陝西諸路舊制馬軍自
十月一日馳射野戰至穀雨日止塞上地涼自今教起
八月止五月一日七月詔諸路教閱禁軍毋過兩時九
月內出教法格并圖象頒行之步射執弓發矢運手舉
足移步及馬射馬使蕃槍馬上野戰格鬪步用標排皆
有法象凡千餘言使軍士習講焉 十一月始立府界
集教大保長法以昭宣使入內內侍省副都知王中正

東上閤門使狄諮兼提舉府界教保甲大保長總二十
二縣爲教場十一所大保長凡二千八百二十五人每
十人一色事藝置教頭一凡禁軍教頭二百七十都教
頭三十使臣十弓以八斗九斗一石爲三等弩以二石
四斗二石七斗三石爲三等馬射九斗八斗爲二等其
材力超拔者爲出等當教時月給錢三千日給食官予
戎械戰袍具銀牒酒醪以爲賞犒 三年大保長藝成
乃立團教法以大保長爲教頭教保丁焉凡一都保相
近者分爲五團卽本團都副保正所居空地聚教之以
大保長藝成者十人滾教五日一周五分其丁以其一
爲騎二爲弓三爲弩府界法成乃推之三路各置文武
官一人提舉河北則狄諮劉定陝西則張山甫河東則
黃廉王崇極以封椿養贍義勇保甲錢糧給其費是歲
引府界保甲武藝成帝親閱錄用能者餘賜金帛

神宗本紀元豐四年三月乙巳命官閱九軍營陣法於
京城南戊申大閱九月壬寅閱河北保甲於崇政殿官
其優者三十六人

蕙田案熙豐教閱之法何紛紛也宋之初制
所重者禁軍廂軍令二者勢無畸重訓練必
精自足以壯威戢亂鄉兵蕃兵備數而已韓
魏公刺陝西義勇而鄉兵日增然害猶未甚
也浸假變爲王安石之保甲法一切募荷耨
之農氓游手之無賴爲之而鄉兵之冗甚矣
於是或立集教法或立團教法或頒教閱新
法或遣提舉或遣近臣內侍長爲保長丁爲
保丁於是元豐四年祇就河北河東陝西路

會校保甲都保凡三千二百六十六正長壯
丁凡六十萬一千九百四十五其時綜計繫
籍義勇保甲及民兵直至七百一十八萬三
千二十八人歲費緡錢至幾百萬又有銀牒
賞錢之賜此皆在常額之外者也夫廂軍取
之欲精教之欲熟不此之求而別立名目多
爲擾費因廂兵之冗占而爲保甲因保甲之
新募而施教法因教法之專於保丁而廂兵
益以懈弛此非熙豐之弊政而何

又案志稱四年改五路義勇爲保甲則是時
義勇卽保甲也五路當卽河北河東陝西京
東京西

兵志元豐四年以九軍法一軍營陣按閱於城南好草

坡已事獎諭熙甯七年詔已降五陣法令諸將教習其
舊教陣法並罷蓋九軍營陣爲方圓曲直銳凡五變是
爲五陣

神宗本紀元豐六年正月御崇政殿閱武士 七年三
月庚申御崇政殿大閱

兵志元祐元年四月右司諫蘇轍上言諸道禁軍自置
將以來日夜按習武藝將兵皆早晚兩教新募之士或
終日不得休息今平居無事朝夕虐之以教閱使無遺
力以治生事衣食殫盡憔悴無聊緩急安得其死力請
使禁軍除新募未習之人其餘月止一教是月朝請卽
任公裕言軍中誦習新法愚惰者頗以爲苦夫射志於
中而擊刺格鬪期於勝豈必盡能如法樞密院亦以爲
元降教閱新法自合教者指授不當令兵眾例誦詔從

之九月樞密院奏異時馬軍教御陣外更教馬射其法全隊馳馬皆重行為之字透空發矢可迭出最便利近歲專用順鬚直射抹鞦背射法止可輕騎挑戰即用眾乃不能重列非便請自今營閱排日馬軍之字射與立背射隔日互教詔可

哲宗本紀元祐二年七月辛亥夏人寇鎮戎軍詔府界三路教閱保甲

兵志三年五月罷提舉教習馬軍所

哲宗本紀元祐五年十二月丙辰禁軍大閱賜以銀牒匹帛

兵志紹聖元年三月樞密院言禁軍春秋大教賞法每千人增取二百一十人給賞有差從之三年五月詔在京府界諸路禁軍格鬪法自今並依元豐條法教習

七月詔選弩手兼習神臂弓八月詔殿前馬步軍司見管教頭別選事藝精強通曉教像體法者展轉教習其弓箭手馬步射親用點藥包指及第二指知鏃並如元豐格法是月又詔復神臂弓射法為百二十步徽宗本紀崇甯四年九月乙巳詔京畿三路保甲並於農隙教閱

兵志大觀二年詔以五陣法頒行諸路

蕙田案五陣法謂方陣圓陣曲陣直陣銳陣也五陣法前此曾罷矣崇甯大觀間紹復熙豐故有此命

政和元年二月詔春秋大教諸軍弓弩斗力並依元豐舊制四年五月臣僚上言神臂弓堞遠百二十步給箭十隻取五中為合格軍中少得該賞恐惰於習射送

殿前馬步軍司勘會將中貼箭數並改爲上塏其一中
貼此兩上塏從之 五年三月詔自今敢占畱將兵不
赴教閱並以違御筆論不按舉者如其罪十一月臣僚
言春秋大教諸軍弓弩上取斗力高強其射親中多者
激賞太薄無以爲勸詔依元豐法 八年詔州郡禁軍
出戍外常畱五分在州教閱從毛友之請也

重和元年正月兵部侍郎宇文粹中進對論禁軍訓練
不精多充雜役帝曰祖宗軍旅之法最爲密緻神考尤
加意訓習近來兵官寢以弛慢古者春振旅夏芟舍秋
治兵冬大閱皆于農隙以講事大司馬教戰之法太宗
伯大田之禮細論周制大抵軍旅之政六卿無有不總
之者今士人作守倅任勸農事不以勸耕稼爲職管軍
府事不以督訓練爲意自今如役使班直及禁衛者當

差人捉探懲戒更候日長卽親御教閱激賞尋以粹中
所奏參照條令行之

宣和三年四月立騎射賞法其背射上塏中貼者依步
射法推賞

欽宗本紀靖康元年冬十月己酉閱砲飛山營

兵志靖康元年二月詔軍兵久教習汰冗濫今三衙與
諸將招軍惟務增數希賞但及等杖不問勇怯招收旣
不精當教習又不以時雜色占破十居三四今宜招兵
之際精加揀擇旣係軍籍專使教習不得以雜色拘占
又神臂弓馬黃弩乃中國長技宜多行教習以扞邊騎
仍令間用衣甲教閱庶使習熟四月詔復置教場春秋
大閱及復內教法以激賞之

蕙田案靖康之詔切中當日之弊東坡云三

伐之法兵農爲一唐中葉盡變府兵爲長征之卒自爾以來農出穀帛以養兵兵出性命以衛農天下便之聖人復起不能易也熙豐以降訖于靖康教閱繁密而兵不足用豈非安石改制之罪耶

高宗建炎元年始頒樞密院教閱法專習制禦摧鋒破敵之藝全副執帶出入短椿神臂弓長柄刀馬射穿甲木挺每歲擬春秋教閱法立新格神臂弓日給箭二十射親去塚百二十步刀長丈二尺以上氈皮裹之引鬪五十二次不令刀頭至地每營選二十人閱習經兩閱者五十人爲一隊教習分合隨隊多少分隸五軍每軍各置旗號前軍緋旗飛鳥爲號後軍皁旗龜爲號左軍青旗蛟爲號右軍白旗虎爲號中軍黃旗神人爲號又

別以五色物號制招旗分旗舉招旗則五軍以旗相應合而成陣舉分旗則五軍以旗相應分而成隊左右前卻或分藏爲伏或分出爲奇皆舉旗爲號更鳴小金應鼓備瞻望不及者豫約伏藏之所緩鳴小金卽止急鳴應鼓卽奇兵出陣趨戰急鳴小金卽伏兵出其春秋大教推賞依海行格法李綱言水戰之利南方所宜沿河淮海江帥府要郡宜倣古制造戰船以運轉輕捷安穩爲良又習火攻以焚敵舟詔命楊觀復往江浙措置河淮別委官

高宗本紀建炎二年冬十月甲寅命揚州濬隍脩城闕江淮州郡水軍三年七月乙巳詔江西閩廣荆湖諸路團教峒丁槍杖手

山堂考索紹興三年十二月辛亥司封員外郎鄭士

彥奏國以兵故強兵以教故精孔子曰以不教民戰是謂棄之甚言其教之不可廢也惟國家方承平之際禁軍教習之法最嚴且密況當艱虞之時其可忽諸方今諸州軍往往冗占椿留實妨教閱大抵以將迎為急務而以教習為虛文伏望深詔有司參酌祖宗成法申嚴而行之每州遴選兵官三兩員專主教習庶責任嚴而成效速歲終則較其精粗而賞罰之如此則兵精而國振矣詔劉與諸路帥司措置施行紹興四年冬十月丁酉詔州縣團教弓手士兵五年春正月庚申置諸州軍教場選兵專習弓弩立格按試禮志紹興五年正月始御射殿閱諸班直殿前司諸軍指教使臣親從宿衛親兵并提轄部押親兵使臣射射共一千二百六十八人每六十八人作一撥遂詔戶部支金

千兩付樞密院激賞庫充犒用三月御射殿閱等子趙青等五十人角力轉資支賜錢銀有差八月御射殿閱廣東路經畧司解發到韶州士庶子弟陳裕試神臂弓特補進武校尉賜紫羅窄衫銀束帶差充本路經畧司指使

高宗本紀紹興十四年十一月甲子復內教即禁中閱試三衙將士

禮志十四年十一月閱殿前馬步軍將士藝精者賞有差自是歲以冬月行之號曰冬教

兵志二十四年臣僚言州郡禁卒遠方縱弛多不訓練春秋教閱臨時備數乞申嚴舊制

高宗本紀紹興三十年秋七月甲申詔諸路帥司春秋教閱禁兵弓弩手三十一年五月壬辰選兩浙江東

福建諸州禁軍弓弩手之半部送樞密院按試秋七月
丙子詔諸路帥臣教閱士兵弓手

兵志三十一年詔比聞諸路州府禁軍土軍有司擅私
役妨教閱帥府其嚴責守兵勒兵歸營訓練精熟以備
點視

禮志三十二年四月二十五日御射殿閱射

乾道二年十一月幸候潮門外大教場次幸白石教場
應從駕臣僚自祥曦殿並戎服起居從駕往回內管軍
御帶環衛官從駕宰執以下免從就逐幕次賜食俟進
晚膳畢免奏萬福并免茶從駕還內二十四日幸候潮
門外大教場進早膳次幸白石教場閱兵三衙率將佐
等導駕詣白石皇帝登臺三衙統制統領官等起居畢
舉黃旗諸軍皆三呼萬歲拜訖三衙管軍奏報取旨賜

軍上馬打圍教場舉白旗三司馬軍首尾相接舉紅旗
向臺合圍聽一金止軍馬各就圍地作圓形排立射生
官兵隨鼓聲出馬射獐兔一金止疊金射生官兵各歸
陣隊舉黃旗射生官兵就御臺下獻所獲帝遂慰勞賜
資諸將鞍馬金帶以及士卒諸軍懽騰鼓舞就列百姓
觀者如山時久陰曠暨帝出郊雲霧解駁風日開霽帝
遣諭主管殿前司王琪等曰前日之教師律整嚴人無
譁囂分合應度朕甚悅之皆卿等力也琪等曰此陛下
神武之化六軍恭謹所致臣願得以此為陛下翦絕奸
宄 四年十月殿前司官相視龍王堂北江岸以東茅
灘一帶平地可作教場已脩築將臺將來三司馬步軍
並各全裝披帶衣甲執色器械至日先赴教場下營排
辦俟駕登臺聽金鼓起居畢依資次變陣教閱所有聖

駕出郊除禁衛外欲于本司入陣馬軍內摘差護聖駕
軍八百人騎弓箭器械作十六隊于儀衛前後引從各
分八隊隊各五十人往回沿路各奏隨軍鼓笛大樂及
摘差本司入教陣隊內諸軍步親隨一千人并統領將
官三員至日先赴將臺下各分左右于後壁周圍留空
地三十步以容禁衛外作三重環立十六日車駕至灘
上諸軍人馬前一日于教場東列幕宿營是日三衙管
軍與各軍統領將佐導駕乘馬至護聖步軍大教場亭
更御甲冑至灘上皇帝登臺三衙起居畢權主管殿前
司王達奏三司人馬齊舉黃旗諸軍呼拜者三達奏請
從頭教閱中軍鳴角倒門角旗出營馬步軍簇隊成收
鼓訖連三鼓馬軍上馬步人撮起旗槍四鼓舉白旗中
軍鼓聲旗應變方陣為備敵之形別高一鼓步軍四向

作禦敵之勢且戰且前馬軍出陣作戰鬪之勢別高一
鼓各分歸地分五鼓舉黃旗變圓陣為自環內固之形
如前節次訖三鼓舉赤旗變銳陣諸軍相屬魚貫斜列
前利後張為衝敵之形亦依前節次訖王達奏人馬教
絕取旨舉青旗變放教直陣收鼓訖一金止重鼓三馬
軍下馬步人齧落旗槍皆應規矩帝大悅犒賞倍之士
卒歡呼謝恩如儀鳴角聲簇隊訖放教拽隊步人分東
西引拽馬軍交頭于御臺下隨隊呈試驍銳大刀武藝
繼而進呈車砲火砲煙槍及赭山打圍射生馬步軍統
制官蕭鷓巴以所獲獐鹿等就御臺下進獻人馬拽絕
皇帝復御常服乘馬至車子院宣喚殿前司撥發官馬
定遠侯彥昌各賜馬一匹彥昌仍自準備將特陞副將
進御酒上謂王達曰今日教閱進止分合軍律整肅皆

五禮集卷三十一
卿之力也達奏陛下神武四海共知六師軍容孰敢不肅時賜酒俱以十分達奏以軍馬事不敢飲帝曰少飲之親減大半飲畢謝恩退又宣問主管侍衛馬軍司李舜舉今日按閱之兵比向時所用之師何如舜舉奏曰今日所治之兵皆陛下平時躬親訓練撫以深恩賜之重賞忠勇百倍非昔日可比

蕙田案乾道二年四年凡兩大閱俱見兵志而禮志爲詳禮志所載儀節與序事頗有不同二年舉白旗紅旗軍馬各就圍地作圓形而其儀則教直銳圓三陣也二年射生官射獐兔而其儀則無射生事也二年獻獲頒賜畢卽訖事退而其儀則於教閱畢後尙有宰執等進御茶御酒諸儀也至四年于禁衛外

又摘護聖馬軍作引從而二年及儀並無之其餘與儀同蓋四年之閱較二年特爲詳備且二年未有茅灘教場祇就白石行之廣狹不同耳

孝宗本紀乾道六年十二月戊申大閱

兵志乾道中詔弓箭手元射一石四斗力升加三斗元射一石力升加五斗弩手元射四石力升加五斗元射兩石七斗力升加八斗進秩推賞有差宰執進射親賞格虞允文曰拍試以斗力升請給今用射親定賞恐不加意斗力上曰然他日雖強弓弩可以取勝若止習射親則斗力不進此賞格不須行

孝宗本紀七年三月乙亥詔訓習水軍五月遣知閤門事王樸點閱荆襄軍馬

五禮通考卷三十三
五
淳熙四年春正月戊申詔自今內外諸軍歲一閱庚申
詔沿江諸軍歲再習水戰十二月乙亥大閱 十年十
一月甲戌幸龍山大閱

兵志淳熙間立槍手及射鐵簾格上謂輔臣曰聞射鐵
簾諸軍鼓躍奮厲周必大曰兵久不用此輩無進取自
然氣惰今陛下激勸告戒人人皆勝兵于是殿前步軍
司諸軍及馬軍舊司弓弩手射鐵簾合格兵共一千八
百四十餘招中垛簾弓箭手一石二斗力十箭弩手四
石力八箭依格進兩秩各賜錢百緡弓箭手一石力十
箭以上弩手三石力八箭各進兩秩詔中外諸軍賞格
亦如之

禮志慶元元年十月以在諒闇令宰執于大教場教閱
甯宗本紀慶元二年冬十月甲戌大閱

嘉泰二年十二月庚寅大閱 三年冬十一月丙午命
兩淮諸州以仲冬教閱民兵弓弩手

兵志寶慶二年吳澤言州郡禁軍平時則以防寇盜有
事則以備戎行實錄於朝廷非州郡可得私役比年州
郡軍政隳廢吝于廩給闕額恆多郡官主兵官有窠占
寓公有借事存留者不什一當教閱時鈴總路分雖號
主兵僅守虛籍莫敢號召入教之次坐作進退殆同兒
戲守臣利虛券不招填主兵受厚賂改年甲且一兵請
給歲不下百緡以小計之一郡占三百人是虛費三萬
緡也私役禁軍素有常憲守帥闢園池建第宅不給餐
錢寓公去城遼絕類得借兵擾害鄉閭近而輔郡至有
寓公占四百兵者良由兵官之權輕而私占之禁弛也
乞嚴戒監司守倅等止許借廂軍仍不得妨教閱餘官

雖廟軍亦勿借

王圻續通考嘉熙四年閏十二月閱軍頭司武伎

淳祐十一年十二月上諭輔臣曰邊事未息武備當嚴五兵所先莫如弧矢昔种世衡守青澗日教習射羌人畏之其法可以推行詔令諸路帥閫守臣講明區畫詳議激勸使各令自備鄉井弓弩箭隻聽從其便

宋史度宗本紀咸淳元年八月庚辰命陳奕沿江按閱軍防賜錢二十萬給用

兵志咸淳初臣僚言諸軍統領統制正將副將正欲在軍訓練閑于武事一有調用令下即行士悉將智將悉士勇所向無敵今江南州郡沿江制閫置帳前官專任營運不為軍計實為家謀絕無戰陳新功率從帳前升差大畧一軍僅二三千而使臣至五六百以供雜役

王圻續通考淳

為賞三等以教射

他知建康府時軍政弛弗治乃

宋史度宗本紀咸淳二年五月癸丑詔諸節制將帥討

軍實節浮費毋占役兵士致妨訓練

兵志九年臣僚言比者招募軍兵一時徒取充數以覈賞格涅刺之後更不教閱主兵官苦以勞役日夜罔休一或少違即羅罟四榜掠之酷兵不堪命而死者逃者接踵也今請以新招軍分隸諸隊使之熟紀律習事藝或旬或月上各礮閱試蓋弊至于此而訓練之制大壞矣

禮志教閱儀皇帝至祥曦殿行門禁衛等並戎服迎駕常起居皇帝至知閣門官以下並戎服常起居訖皇帝乘馬出從駕官從駕至候潮門外大教場御幄殿下馬

入幄更衣訖皇帝被金甲出幄行門禁衛等迎駕奏萬
福皇帝乘馬至教場臺下馬升臺入幄從駕官宰執親
王使相正任知開御帶環衛官升臺於幄殿分東西相
向立管軍並令全裝衣甲帶御器械執骨朶升臺于幄
殿稍南面西立俟入內官喝排立皇帝出幄行門禁衛
等迎駕奏萬福皇帝出閣門分引殿前馬步三司統制
統領官常起居訖次三司將佐以下聽鼓聲常起居次
殿帥執骨朶赴御座前奏教直陣俟教閱畢再赴御座
前奏教圓陣俟教閱畢再赴御座前奏教銳陣俟教閱
畢再赴御座前奏教閱畢侍立內侍傳旨與殿前太
尉某諸軍謝恩承旨訖轉與撥發官引三司統制統領
將佐再拜謝恩訖各歸本軍皇帝起入幄更衣訖皇帝
出幄皇帝坐舍人引宰執墩後立俟進御茶牀舍人贊

就坐宰執躬身應喏訖直身立就坐進第一盞酒起立
墩後俟皇帝飲酒訖舍人贊就坐躬身應喏訖直身立
俟宰執酒至接盞飲酒訖盞付殿侍次舍人贊食並如
儀至第四盞傳旨宣勸訖御藥傳旨不拜舍人承旨贊
不拜贊就坐第五盞宣勸如第四盞儀酒食畢舉御茶
牀舍人分引宰執于幄殿重行立御藥傳旨不拜舍人
承旨訖揖宰執躬身贊不拜各祇候直身立降踏道歸
幕次皇帝起乘馬至車子院下馬皇帝出幄至車子院
門樓上出賜親王酒再拜謝訖次賜使相正任並管軍
知開御帶環衛官酒訖逐班再拜謝訖依舊向立次親
王執盞進皇帝酒皇帝飲酒訖一班再拜謝訖俟皇帝
觀畢起降車子院門樓歸幄親王以下退皇帝乘馬出
車子院門行門禁衛等迎駕奏萬福皇帝乘馬至候潮

門外大教場應從駕官並戎服乘馬從駕回皇帝乘馬
入和甯門至祥曦殿上下馬還宮

乾道御教記大閱先一日諸軍人馬金裝執色于教場
東布列軍幕宿營至日殿前馬步諸軍先赴教場下方
營并親隨軍排列將壇之後質明三衙管軍官並金裝
從駕上自祥曦殿戎服乘馬太子親王宰執近臣並戎
服乘馬以從護聖駕馬軍八百騎分執鎗旗弓矢軍器
前後奏隨軍番部大樂等駕入教場升幄殿殿帥執摠
躬身奏諸司人馬排立齊舉黃旗招諸軍向御殿椰子
一鼓唱喏一鼓呼萬歲再一鼓又呼萬歲疊鼓呼萬萬
歲又一鼓唱喏殿帥奏取聖旨鳴角發嚴上御金裝甲
胄登將壇幄殿鳴角戒嚴殿帥奏取聖旨馬步軍整隊
成屯以備教戰連三鼓馬軍上馬步軍起旗槍分東西

為應敵之勢舉白旗教方陣黃旗變圓陣阜旗變曲陣
青旗變直陣緋旗變銳陣緋心阜旗作長蛇陣緋心白
旗作伏虎陣殿帥奏取聖旨兩陣各遣勇將挑戰變八
圓陣疊鼓舉旗左馬軍戰右步軍右馬軍戰左步軍再
疊鼓交旗擊刺混戰三疊金分陣大勢馬軍四面大戰
三疊金分陣殿帥奏教陣訖取旨人馬排列當頭鳴角
簇隊以俟放教諸軍呈大刀車砲煙槍諸色武藝御前
傳宣撫諭將士射生官進獻獐鹿上更戎服賜宰臣已
下對御酒五行殿帥奏取旨謝恩如前唱喏訖駕出教
場

蕙田案南宋自慶元嘉泰以後禁衛之訓練
猶間行之而外郡之兵多為州軍官所占役
謂之軍匠甚至雕鏤組繡攻金設色之事皆

兵爲之蓋光甯怠廢重以韓賈諸姦姑息之習成虛糜之政煩也

右宋

遼史太宗本紀天顯元年十二月甲辰閱旗鼓 三年春正月己酉閱北剋兵籍庚戌閱南剋兵籍丁巳閱皮室拽刺墨離三軍 四年冬十月甲辰幸諸營閱軍籍庚戌以雲中郡縣未下大閱六軍 會同三年五月戊子閱騎兵于南郊六月丙申閱步卒于南郊 七年十二月癸卯南伐甲子次古北口閏月己巳朔閱諸道兵于溫榆河 九年八月自將南伐九月壬辰閱諸道兵于漁陽西棗林定 聖宗本紀統和元年冬十月上將征高麗親閱東京留守耶律末只所總兵馬 三年七月丁卯遣使閱東京

諸軍兵器及東征道路 四年十一月癸酉御正殿大

勞南征將校丙子南伐次狹底堦皇太后親閱輜重兵

甲 十四年冬十月丙辰命劉遂教南京神武軍士劍

法賜袍帶錦幣

興宗本紀重熙四年十二月癸丑詔諸軍砲弩弓劍手

以時閱習

道宗本紀壽隆元年九月丙辰詔西京砲人弩人教西

北路漢軍

蕙田案遼史兵衛志初分迭刺部爲二又分屬珊軍皮室軍此御帳親軍也各宮有正丁轉丁騎軍各京有提轄司此宮衛騎軍也親王大臣所置私甲則大首領部族軍及眾部族軍也此皆屬禁衛至五京鄉丁則分屬州

縣者矣其校閱之事祇見於本紀而志不及以今推之本紀所載國主白臨閱者皆禁衛之軍其宮衛騎軍當使提轄司臨閱首領部族軍當使招討司統軍司部署司兵馬司臨閱也

金史太宗本紀天會三年八月壬子詔有司揀閱善射勇健之士以備宋

王圻續通考天會三年十月詔分遣鶻沙虎等十三人閱諸路丁壯調赴軍

金史世宗本紀天定二十二年三月丁丑命尙書省申勅西北路招討司勒猛安謀克官督部人習武備二十六年十月庚寅上謂宰臣曰西南西北兩路招討司地隘猛安人戶無處圍獵不能閑習騎射委各猛安謀

克官依時教練其弛慢過期及不親監視並決罰之

章宗本紀明昌六年五月乙巳詔諸路猛安謀克農隙講武本路提刑司察其惰者罰之

承安三年正月丁巳併上京東京兩路提刑司爲一提刑使副兼安撫使副安撫專掌教習武事毋令改其本俗

王圻續通考承安四年九月詔訓練軍士

金史宣宗本紀貞祐三年三月丙寅勅河東河北大名長貳官訓練隨處義兵隣境有警責其救援

興定二年六月甲辰樞密院言諸路表稱大元集兵應州飛狐將分道南下觀其意不在河北而在陝西河東各路義士土兵蕃漢弓箭手宜于農隙教閱以備緩急

蕙田案金兵志諸部長爲孛堇千夫長爲猛

安百夫長爲謀克天會二年罷是制凡諸部
降人但置長吏以下從漢官之號燕山八路
民兵隸諸萬戶蓋金之初起將志一而兵力
齊其時校閱訓練之制史志無文殆不教而
自精也明章以下雜用漢制兵之訓練大約
責成於招討安撫二司矣

元史兵志至元九年正月河南省請益兵勅諸路僉軍
三萬詔元帥府統軍司總管萬戶府閱實軍籍
世祖本紀至元十六年十一月戊子命湖北道宣慰使
劉深教練鄂州漢陽新附水軍 二十二年十二月己
亥江淮行省以戰船千艘習水戰江中 二十五年六
月乙丑詔蒙古人總漢軍閱習水戰
成宗本紀大德五年十一月丁未選六御扈從漢軍習

武事仍禁萬戶以下毋令私代犯者斷罪有差

仁宗本紀至大四年冬十月壬辰勅諸衛漢軍練習武
事

皇慶元年夏四月庚午命浙東都元帥鄭祐同江浙軍
官教練水軍

延祐元年十月監察御史言乞命樞密院設法教練士
卒一應軍官襲職者試以武事而後任之詔曰可

英宗本紀延祐七年十一月遣使閱實各行省戍兵
至治三年春正月遣回回砲手萬戶赴汝甯新蔡遵世
祖舊制教習砲法

泰定帝本紀泰定三年八月乙亥遣乃馬台簡閱邊兵
十二月御史言比年營繕以備軍供役廢武事不講請
遵世祖舊制教習五衛親軍以備扈從不報 四年二

月詔同僉樞密院事燕帖木兒教閱諸衛軍

蕙田案元史兵志國初典兵之官長萬夫者為萬戶千夫者為千戶百夫者為百戶世祖脩官制內立五衛以總宿衛諸軍衛設親軍都指揮使外則萬戶之下置總管千戶之下置總把百戶之下置彈壓立樞密院以總之遇方面有警則置行樞密院事已則廢而移都鎮撫司屬行省以上皆軍官也然其校閱之事則不專於以上諸官其在外則令元帥府統軍司主之或宣慰使或都元帥其在內或特遣人如泰定三年之遣乃馬台四年之遣燕帖木兒是也此正當日內外相維文武相制之深意

右遼金元

王圻續通考明太祖吳元年春三月大閱時張士誠據兩淮未下太祖議征討遂揀將士更制編伍命鎮撫居明領之分隊習戰勝者賞銀十兩其傷而不退者亦稱勇敢士賞銀有差因諭之曰刀不素持必致血指舟不素操必致傾業弓馬不善習而欲攻戰未有不敗者吾故令汝等練之汝等勇健若此臨敵何憂不克爵賞富貴惟有功者得之又謂起居注詹同曰兵不貴多而貴精多而不精徒累行陣近來軍中募兵多有冗濫故特戒之冀得精銳庶幾有用也初定鼎金陵置五軍營設大教場在都城外南二里小教場在國子監之右望皇城迤西

大政紀洪武六年正月壬子命吉安侯陸仲亨偕大同

都督何文輝往北平練兵防禦戊午命中書省臣同大都督府御史臺六部議教練軍士律

明會典凡操練洪武六年定操練軍士律騎卒必善馳射及鎗刀步兵必善弓弩及鎗凡射十二箭內六箭遠可到近可中爲試中遠可到將士以一百六十步軍士以一百二十步近可中以五十步凡射弩每用十二箭內五箭遠可到蹶張以八十步划車以六十步凡用鎗以進退習熟爲試中凡在京衛所每一衛以五千人爲則內取一千人令所管指揮千百戶總小旗領赴御前試驗餘以次輪班在外都司衛所每衛五千人取一千人令千百戶總小旗領赴京師一體試驗餘以次輪班其所試軍士如騎卒騎射便熟善鎗刀步軍善弓弩及鎗者所管指揮千百戶總小旗各以其能受賞不中者

降罰軍士中者受賞不中者亦給錢六百文爲道里費指揮所管軍士一千人內三百人至四百人不中者住俸四箇月四百至五百人不中者住俸半年五百人至六百人不中者住俸十箇月六百人至七百人不中者住俸一年七百人以上不中者指揮使降同知同知降僉事僉事降千戶千戶所管軍士一千人內二百人至四百人不中者住俸半年四百人至六百人不中者住俸一年六百人以上不中者降百戶百戶所管軍士一百人內二十人至四十人不中者住俸半年四十人至六十人不中者住俸一年六十人以上不中降充總旗總旗所管五十人內二十五人以上不中小旗所管十人內五人以上不中者皆降爲軍在京衛所發廣西南甯柳州守禦在外衛所北方者發南煙瘴地方南方者

發迤北極邊衛分守禦各都指揮使司所試軍士四分
以上不中者住俸一年六分以上不中者都指揮罷職

蕙田案此校閱律令格式

大政紀洪武十年正月命都督僉事藍玉練兵東昌

十一年正月命信國公湯和率列侯韓政郭興俞通源
黃彬練兵臨清以聽調遣

明史兵志洪武十六年令天下衛所善射者十選一於
農隙分番赴京較閱以優劣為千百戶賞罰邊軍本衛
較射

太祖本紀二十年二月壬午閱武

兵志洪武二十年命衛士習射於午門丹墀明年復令
天下衛所馬步軍士各分十班將弁以蔭叙久次陞者
統之冬月至京閱試指揮千百戶年深慣戰及屯田者

免明年詔五軍府比試軍士分三等賞鈔又各給鈔三
錠為路費不中者亦給之明年再試不如式軍移戍雲
南官謫從征總小旗降為軍武臣子弟襲職試騎步射
不中程令還衛與半俸二年後仍試如故者亦降為軍
太祖本紀二十四年五月戊戌漢衛谷慶甯岷六王練
兵臨清 二十五年二月戊午靖甯侯葉昇等練兵於
河南及臨鞏閏月戊戌馮勝為總兵官傅友德副之練
兵山西河南 二十六年三月辛亥長興侯耿炳文練
兵陝西 三十年秋八月甲午李景隆為征虜大將軍
練兵河南

王圻續通考初立大小教場以練五軍將士永樂初既
有五軍又有三千營以司寶燾令旗神機營以司神鎗
火器是為三大營各營管操者曰提督各哨分管官曰

坐司俱奏請于公侯伯都督都指揮內推選永樂間始
間用內臣而神機火器則特命內臣監之曰監鎗又有
掌號把總把司牌等官皆于都指揮內推選又京營之
制主訓練在京官軍永樂遷都又于中都大甯山東河
南附近衛所摘撥官軍輪班上操以內衛京師外備四
方征伐云 五軍營曰中軍曰左掖曰右掖曰左哨曰
右哨管操練京衛及中都留守司山東河南大甯三都
司各衛輪班馬步軍又有十二營管隨駕擺列馬隊官
軍圍子手營管操練上直義刀手及京衛步隊官軍幼
官舍人營管操練京衛幼官及應襲舍人殫忠効義營
管操練京衛報効舍人餘丁皆五軍之支分也永樂初
始以龍旗寶纛勇字旗負御寶及兵仗局什物等件上
直官軍一營左右二十隊勇字旗大駕旗纛金鼓等件

上直官軍一管傳令旗令牌御用監盛甲尙冠尙衣尙
履什物等件上直官軍一管執大駕勇字旗五軍紅盛
貼直官軍一管殺虎手馬橋及前哨馬營上直明甲官
軍又有隨侍營隨侍東宮官舍遼東備禦回還官軍此
則三千營之支分也後永樂間因征交趾得其神機火
箭之法遂立神機營亦設中軍左掖右掖左哨右哨各
有坐營把司把牌等官管操演神銃神砲等項火器又
有五千下者因得都督譚廣馬五千匹今謂之譚家馬
者卽此亦另置坐營把司等官統之此則神機營之支
分也

明史兵志文皇卽位五駕北征六師嘗自較閱又嘗勅
秦晉周肅諸王各選護衛軍五千命官督赴眞定操練
陝西甘肅甯夏大同遼東諸守將及中都留守河南等

都司徐宿等衛遣將統馬步軍分駐真定德州操練候
赴京閱視

蕙田案永樂中選步騎兵遣能幹指揮千戶
百戶統領赴京閱視此京操與輪採並重之
始也考大事記於正史所舉諸處外尙有陝
西守將山東山西陝西都司淮邳淮安揚州
武平歸德睢陽潼關諸衛較正史更詳備

大政紀永樂八年二月丁巳駐蹕宣府閱武營內癸亥
命鎮守大同江陰侯吳高操練山西大同天城陽和等
處軍馬整理城池節制山西都司行都司及太原三護
衛官軍甲子駐蹕興和閱武營外上指揮將士坐作進
退折旋無不如旨 十二年三月庚寅車駕發北京四
月甲辰朔駐蹕興和己酉大閱軍士于沙城五月癸酉

朔駐蹕楊林戍大閱武

明會典凡行軍號令永樂十二年令凡交鋒之際突入
賊陣透出其背殺敗賊眾者敢勇入陣斬將奉旗者本
隊已敗賊眾別隊勝負未決而能救援克敵者受命能
任其事出奇破賊成功者皆爲奇功齊力進前首先敗
賊者前隊交鋒未決後隊向前殺敗賊眾者皆爲頭功
凡建立奇功頭功者其親管頭目卽爲報知妄報者治
以重罪行營及下營之時擒獲奸細者陞賞准頭功哨
馬生擒寇賊一人者賞銀三十兩斬首一級者二十兩
凡行營之時遇有鞍馬衣服器械不同者衣甲器械相
同而喝問答號不同者皆卽擒之來降寇賊所攜人口
財畜分毫不許侵犯卽時來報凡與賊對陣須齊力殺
賊不許聚爲一處掣拽空缺如力不能支不能決勝無

勇無謀及不盡力殺賊者全伍皆斬凡隊伍已定不許馬軍入步隊步軍入馬隊違者重罪如臨陣混戰失其本隊插入別隊者不拘凡殺敗寇賊須盡力進剿不許搶掠人畜財物違者重罪如所乘馬困乏許以所擒賊馬換乘凡對敵之際一隊遞看一隊有不齊力前進者戰勝之後連隊之人首告治以重罪容情不首告者罪同凡管軍頭目須愛恤軍士亦聽令不許怠慢如伍中有一人不在小旗報總旗總旗報百戶以次報至總兵官總兵官奏知從征官軍有在逃者斬該管頭目不報者重罪凡軍士須人馬相應不許以輒弱不堪者插入隊伍如人壯馬弱或馬壯人弱者許弱者以馬與壯者若自己有馬臨戰之際能借與驍勇者殺賊有功許借馬人分賞不願分者聽其戰馬臨敵許騎無事騎者治

罪各營馬驢須愛恤馱載該管官時常點閱有故違及將軍器拋失或盜賣者俱重罪凡軍士行糧該管官旗時行點閱有過用及遺棄者并該管頭目皆斬凡軍行及下營之時須各認隊伍不許擅離及雜入別營別隊違者併該管頭目俱重罪凡夜行相遇即喝問有答號不得者擒送辨驗果是奸細照例陞賞故不答號及見而不擒者事覺俱治以重罪凡軍中遇夜以各樣大小銅角管聲爲號不許聲音相同各聽號聲識認隊伍不許叫營違者論罪但夜間有喧譁者即問所起之處及左右應聲之人與該管頭目皆治以重罪凡行營須待大營旗纛起行或聽駕前銅角聲各營方許起行每日下營量撥步軍或五隊十隊馬軍五隊或三四隊步軍披甲馬軍不摘鞍伺候長圍及架砲者布列已定方許

人營休息有盜人衣糧諸物及盜驢馬宰殺并檢括隱藏人遺失物者俱斬知情實首者給賞知而不首者同罪若收得馬驢騾者即送該軍轉送大營召人識認如有遺失被後哨官軍收獲者收後官治以重罪凡各營有失火者即是與賊遞送消息并該管頭目俱重罪其每日行營不許在途炊飯違者并本管頭目皆斬下營掘井必令人監守不許作踐及占藏自用凡軍中有病者管隊官旗即令醫療掌藥料官及醫士常加巡視不許勒取財物違者重罪凡長圍及坐冷者須晝夜關防各營架砲者務依方瞭望有灰塵揚起人馬往來若聞哨馬營及四面砲響即時傳報其管事官遇有事隨即飛報不許頃刻遲慢凡掠陣官臨敵時視有畏避退後者即斬之紀功過官遇有功者即紀之有過者即錄

之以憑賞罰凡臨陣令內官持象牙牌視有勇敢當先殺賊能立奇功頭功者即與牙牌收執徑赴大營給與勘合以憑陞賞凡軍中有妄談災異及妖言或漏洩軍機者皆斬知情不首者罪同首實者重賞凡見鹿及野馬黃羊諸物驚走突入營伍及望見塵起及旋風揚沙野獸騰踏及見死馬牛羊與牛羊駝馬遺穢蹤跡或拾得一應物件若男女衣服首飾并文字等項不論久近隨即報知凡軍行在道不許圍獵或遠望似馬非馬似鹿非鹿似人非人白日見煙入夜見火不論是非即報凡功次務須實報有虛誑者重罪所報實者給與勘合無勘合者不准陞賞凡號令總兵官告都指揮都指揮告指揮指揮告千戶千戶告百戶百戶告總旗總旗告小旗小旗告軍士務令遵守

蕙田案此申明行軍號令

明史成祖本紀永樂二十年夏四月乙卯次雲州大閱
五月乙丑獵于偏嶺丁卯大閱辛未次西涼亭壬申大
閱 二十一年秋七月戊申次宣府八月己酉大閱

二十二年三月戊寅大閱

仁宗本紀永樂二十二年十一月乙亥始命近畿諸衛

官軍更番詣京師操練

宣宗本紀宣德元年春正月己未遣侍郎黃宗載十五
人清理天下軍伍後遣使著為令

明會典凡輪操宣德元年調河南山東大甯都司中都
留守司直隸淮揚等衛及宣府軍士至京操備令每歲
輪班往來

明通紀宣德三年八月車駕巡邊閱武 四年七月上

巡邊校獵閱武尋還京

天政紀正統元年十月望車駕閱武于將臺上命諸將
騎射以三矢為率受命者萬餘 十一年十月閱武近

郊

明史英宗前紀正統十四年六月戊寅平鄉伯陳懷駙
馬都尉井源都督王貴吳克勤太監林壽分練京軍於

大同宣府

明會典正統十四年令外衛輪班京操者前班三月還
八月到後班八月還次年三月到河南山東北直隸強
壯官軍皆隸前班

蕙田案洪武之際國勢草創其練兵也皆因
出師征討而無事之時未有定式永樂有定
式矣然天子自行大閱者亦為命將出師或

親征行之也仁宣之世亦然景泰以後因土
木之變國家多故特重京操隆萬以還操練
更頻數矣然兵反不如洪武者戚繼光所謂
但練花法與陣上所用全不相涉耳

明史景帝本紀景泰三年十二月癸巳始立團營太監
阮讓都督楊俊等分統之聽于謙石亨太監劉永誠曹
吉祥節制

王圻續通考明景泰三年始立京營團操法先是京軍
分立三大營及土木變後卒伍耗弱屬邊報時警京師
戒嚴兵部尙書于謙建議云此三營不相統一每遇調
遣選摘號令不同兵將不相識或因而誤事請揀選諸
營五步官軍一十五萬分爲十營團操以備警急是團
營每營官軍一萬五千員名各以都督領之每兵五千

用都指揮一員十營共指揮三十員每營中每千用都
指揮或指揮一員共十五員指總共五百名分管每隊
用管隊官二員又命兵部尙書或都御史一員提督之
嘗令在營操練統體相維兵將相識出征就令原都督
等統領前去庶號令歸一而行伍不亂制曰可

成化三年始立十二團營法時議抽選京衛伉健八萬
外衛八萬外衛者分二班每班四萬連京衛共十二萬
分爲十二營曰奮武曰耀武曰練武曰顯武曰敢勇曰
果勇曰效勇曰鼓勇曰立威曰伸威曰揚威曰振威是
爲十二團營而三大營官軍之數不與焉每營各分五
軍三千神機三營五軍營管內外馬步官軍三千營管
內外馬隊官軍神機營管內外步隊官軍每營各設坐
營把總等官統之若遇出征卽量調而行三大營所揀

存老弱者名曰老家兒專備營造差撥等用十二團營
益以北直隸各衛曰京及山東河南江北各都司衛所精
兵曰見并三大營兵共二十五萬實之分為春秋二班團
操聽征十二營之制又自此始

天政紀成化三年四月復十二團營命太子少保兵部
尚書白圭不妨部事提督操練

明通紀成化九年十月上閱武于內苑公侯而下皆騎
射英國公張懋三發連中上大喜錫鈔千貫白金五十

兩金帶一束尋命掌中軍都督府事提督五軍營
宏治十五年春發保定京操軍回衛團操先是上欲于

附近地方團操人馬以為京師左右掖以問劉大夏對
曰京西保定府地方獨設都司統五衛仰思祖宗恐亦

是此意未幾一御史陳言奏將保定兩班一萬餘人回

衛團練奏入上可之遂勅都指揮戴儀往任其事乃有
造飛語帖子于宮門以誣大夏上曰宮門豈外人可到

必此曹忿不得私役此軍者所為耳
王圻續通考嘉靖十四年設池河演武場在定遠縣東

二十里時雖遷都于北而在南兵衛不廢且練習以時
皆轄于兵部及操江都御史蓋以重根本而飭江防云

十五年都御史兼提督團營王廷相上疏云即今團
營內外官軍雖有十二萬之數而京衛撥去捕盜已五

千六百員名外衛撥去各處做工及拽木等項常不下
二萬有零雖云暫時借用而營伍經年空缺其見操者

中間老弱疲羸不能執弓習藝者甚眾校閱之際已不
堪觀脫有緊急邊情調遣又安望其投石超距奮勇以

禦敵哉又團營軍士派之雜差撥之做工畱之拽木終

歲不得入操困苦以勞其身而敵愾之氣縮畚鍤以奪其習而弓馬之藝疎雖有團營聽征之名實與田畝常耕之夫無異是不能養其氣于未戰之先又軍士替役之難緣吏胥需索重賄貧軍不能辨此是以終年累月老弱在營苟且應役而精壯子弟不得收練是當革其弊于搭補之時又三大營挑選精壯以聽征有等富貴奸猾之徒懼營操出征之苦賄該管人員偽為不堪之數揀存本營其貧者不能營幹常川操練是當革其弊營買差之弊由斯三者軍士之所以不精力也丙申詔改大興隆寺為講武堂先是兵部以為言上諭輔臣改之又諭禮部尚書夏言曰雖是兵事係典禮卿部裏可具奏來言奏曰周禮大司馬每遇仲月因時教武惟冬農隙則大閱之在漢有會都平樂觀之講唐有都外驪山之講宋有近郊西郊之講歷代之典雖各不同然

倣古周制思慮預防蓋未始有二也太祖高皇帝經理淮甸親閱試將士太宗文皇帝靖難之後亦時加簡練是以國初名將疊出類皆文武兼資韜略素習威震沙漠策勲闕庭漢唐宋以來所未有也及今百七十餘年承平日久武備漸弛將驕卒惰幾不知兵宜有足履聖慮者講武事誠不可緩上嘉納之言因條三事以進一曰專教將領一曰尊崇廟祀一曰時加懲勸大政紀隆慶二年八月大學士張居正疏陳六事一飭武備今議者皆曰兵不多食不足將帥不得其人臣以為此三者皆不足慮也夫兵不患少而慮弱今軍伍雖缺而糧籍具存若能按籍徵求清查影占隨宜募補著實訓練何患無兵捐無用不急之費併其才力以撫養鬪戰之士何患無財懸重賞以勸有功寬文法以伸將

權則忠勇之夫孰不思奮又何患于無將臣之所患特
患於無奮勵激發之志耳故願皇上急先自治之圖堅
定必爲之志屬任謀臣脩舉實政不求近功不忘有事
熟計而審行之不出五年敵可圖矣至于目前自守之
策莫要于選擇邊吏團操鄉兵併守墩堡令民收保時
簡精銳出其空虛以制之卽敵入犯亦可不至大失又
考之古禮及我祖宗故事俱有大閱之禮以習武事而
戒不虞今京城內外守備單弱臣嘗以爲憂伏乞勅下
戎政大臣申嚴軍政設法訓練每歲或間歲季冬農隙
之時恭請聖駕親臨校閱一以試將官之能否一以觀
軍士之勇怯注意武備整飭戎事亦足以伐狂寇之謀
銷未萌之患誠轉弱爲強之一機也疏入上曰覽卿奏
皆深切時務具見謀國忠懇該部看議以聞兵部議覆

飭武備事宜其一議兵祖宗朝九邊兵以百萬計今尙
存六十萬有奇其逃者若能設法請補原額亦可盡復
至于團練之法當令各邊選編見在軍士五人爲伍五
伍爲一隊各立之長長各擇教師教以武藝其一議食
冗兵汰則冒替之糧減主兵練則客兵之餉省我兵能
戰而敵一遭判則數年不擾而行糧可免敵旣遠遁則
我之威力能制屬裔之死命而撫賞亦可罷是足食之
方已寓于練兵之中矣至于興屯監以復本色視豐儉
以爲折支又在戶部酌議施行其一議將將才難得亦
難任今邊臣不肯效死者弊在操切太過爵賞太輕請
令督撫兵備官一切闕外之務悉聽總兵而下自擇進
止不得拘以文法其一議選擇邊吏各邊守令務得真
才其一議團練鄉兵凡沿邊郡縣不分城市村堡軍餘

民舍皆列爲鄉兵如邊軍隊伍之制各不妨農務隨時
訓習遇有寇警移檄郡縣轉相告諭各率鄉兵乘機防
守賊退而鄉兵有斬獲者仍照軍例陞賞雖無斬獲而
防守無失者亦量犒之其一議守城堡寇賊臨牆不能
拒之邊外則當急入收堡而邊內城堡又不能盡守則
當擇適中之處將附近小堡併入大堡脩城浚濠務得
堅固其軍民有自願包磚者聽亦量助之其一議整飭
京營祖宗設立京營屯兵數十萬歲久逃亡者眾見存
僅九萬餘人中又多四方竄籍之人有以一人而應三
五役者卽春秋操演亦虛文耳今宜盡數報冊有名者
行衛查補無名者發單清勾兵數旣足仍行戎政大臣
從實操練季冬會同巡視科道官視勤惰以聞至于大
閱之禮宣宗嘗行之免兒山英宗嘗行之北郊又嘗行

之西苑望自隆慶二年爲始于季冬農隙之候恭請聖
駕親臨校閱一以甄別將官驗其教練之多寡以爲黜
陟之次第一以考校軍士視其技藝之高下以爲賞賚
之等差但有老弱卽行汰易上曰然大閱旣祖宗成憲
允宜脩舉兵部宜與戎政官先期整飭俟明年八月內
來聞餘悉如議

明會典隆慶二年題准大閱儀注先一日預告於內殿
用告詞行四拜禮如出郊常儀是日司禮監設御幄于
將臺下總協戎政大臣巡視科道官督率將領軍兵預
肅教場內外至日早遣官於教場內祭旗燾之神三大
營官軍俱各披戴陳旌旗器械于本營擺列仍選撥將
官四員統領有馬戰兵二十名于長安左門外伺候扈
駕文職各堂上官六科十三道掌印官并禮科兵科禮

部儀制司兵部四司官及糾儀官監射御史鴻臚寺供事官武職除應該操閱外其餘都督以上并錦衣衛堂上及南鎮撫司掌印僉書官各具大紅便服關領扈從牙牌懸帶俱詣教場伺候一是日免朝錦衣衛備鹵簿駕設輦于皇極門下上常服乘輦由長安左門出扈駕官軍前後導從鈺鼓響器振作從安定門出至闕武門外總協戎政官率領大小將佐官戎服跪迎候駕過方起隨入將臺下北向序立駕進闕武門內中軍舉號砲三各營鈺鼓響器振作扈從官序立于行宮門外迎駕上到行宮門降輦兵部官導上入行宮鳴金止鼓候上升座扈從官行一拜叩頭禮傳賜酒飯各官仍叩頭謝恩畢卽退出於將臺下東向序立兵部官跪奏請登臺夫閱兵部鴻臚寺官導上登臺陞御幄舉號砲三鴻臚

寺官跪奏京營將士叩頭贊一拜叩頭禮畢分東西侍立總協戎政官列于扈從官之北其餘將佐列於扈從官之南兵部尙書跪奏請令各營整搦人馬承旨舉將臺上吹號笛麾黃旗總協戎政官指揮副參遊佐等官各歸所部整搦人馬兵部尙書跪奏請閱陣號砲三馬步官軍演陣悉如常法演畢將臺上吹號笛麾黃旗各將官軍士俱各回營少頃兵部尙書跪奏請閱射總協戎政官指揮副遊參佐坐營號頭中軍千總等官及聽射公侯駙馬伯錦衣衛等官俱於將臺下比較射藝馬上人各三箭步下人各六箭中的者鳴鼓以報用御史二員兵部司官二員監視紀錄其餘把總以下及家丁軍士射箭以府部大臣并御史及兵部司官各四員於東西廳分投校閱一體紀錄其刀鎗火器等藝聽總協

戎政官各量取一隊於御前呈驗訖兵部尙書跪奏大閱畢將臺上舉號旗總協戎政官及大小將領俱詣將臺下北向序立鴻臚寺官奏傳制贊跪各官皆跪鴻臚寺官宣制訖贊叩頭各官叩頭訖先退出閱武門外伺候仍贊扈從官行叩頭禮訖鴻臚寺官奏禮畢上回行宮少憩扈從官趨至閱武門內序立伺候送駕上陸輦中軍舉號砲三各營鼓吹齊鳴鹵簿及馬戰兵導從如來儀鉦鼓響器與大樂相應振作總協戎政以下官候駕至跪叩頭退馬戰兵至長安左門外止鹵簿大樂至午門外止上還仍詣內殿參謁如前儀是日百官不係扈從者各具吉服於承天門外橋南向北序立恭送候駕出長安左門退于本衙辦事駕還之時仍前序立迎候駕入午門百官退

蕙田案以上專論京營及輪班馬軍教練之儀

又案明太祖初卽位卽命元勛宿將如馮勝傅友德輩分道練兵但未有定制其後洪武二十一年始下操練法俾遵行不如法及不嫻習者罰是時操練之制蓋內外並重也景泰初始立十團營給事中鄧林進軒轅圖卽八陣法因用以教軍成化間增團營爲十二命月二次會操起仲春十五日止仲夏十五日秋冬亦如之嘉靖六年又申其制隆慶初命各營將領以教練軍士分數多寡爲黜陟全營教練者加都督僉事以次減全不教練者降祖職一級革任回衛三年內教練有成

操協大臣獎諭恩錄無功績者議罰於是操
練乃特重于京營矣其衛所兵操練之制兵
志畧而不言然京營之重如此而及其末造
兵力衰弱不振者何歟此則志所謂規制雖
立將卒惰媮操演徒爲具文故也

又案輪班馬軍本衛所之軍而番上京師者
也始於永樂十三年其制頗有唐府兵番上
宿衛之遺意此雖屬外兵實與京營同教練
者

又案王圻續通考及會典所載永樂摘撥官
軍輪班之制但有中都大甯山東河南四處
明史兵志則併及山西陝西各都司及江南
北諸衛其說不同竊以旣調官軍輪班不應

但舉四處當以正史爲據

大政紀隆慶三年八月大閱將士于京營教場是日上
戎服登壇軍容整肅 五年正月以歲終閱視京營將
士

明史兵志穆宗從給事中吳時來請命戚繼光練兵薊
門薊兵精整者數十年繼光著練兵實紀以訓士一曰
練伍首騎次步次車次輜重先選伍次較藝總之以合
營二曰練膽氣使明作止進退及上下統屬相友相助
之義三曰練耳使明號令四曰練手足使熟技藝五曰
練營陣詳布陣起行結營及交鋒之正變終之以練將
明會典神宗九月上親大閱一如隆慶中故事

蕙田案明之軍制變於團營操演教閱此爲
最重一罷於英宗天順元年四月至憲宗成

五禮通考卷第二十四
化二年四月而復再罷於武宗正德十六年
三月至穆宗隆慶二年而復復之是也然而
憲孝以上以團營而盛嘉隆以後以團營而
衰孝宗十八年已有工作不得擅役團營軍
士之詔及觀王廷相所陳則占役買閒積弊
尤甚矣李夢陽亦言十二團營近日欲遣將
北伐拔之不滿三萬狼狽若此何也官不恤
軍豪勢多占壯丁各營其身老弱出而應點
冗食而無補空名而鮮實也明史兵志謂京
軍積弱由於占役買閒而其弊實始於紉袴
之營帥監視之中官後人可不鑒哉

右明

